



ル 5
3134
13



凡 5  
3134  
13

南潯志卷四十八

里人周慶雲纂

集詩一

次龐夷簡禮部兼寄近況

歸安 趙孟頫 子昂

故山深處桂陰濃  
雲碓無人水自舂  
玉友一樽為老伴  
木奴千樹當侯封  
宦途坎壈謀身拙  
病骨支離觸事慵  
早挂一帆歸去好  
五湖煙景最情鍾

末云園丁遠報山圃久  
蕪水碓空設不覺悵然興  
秋風之感足下先隱湖潯  
愚達倍蓰僕從之晏矣不勝  
祇服檢得示韻奉酬言不盡  
意陝帖模糊內司本近值湧  
覓昇元本報奉孟頫頓首

感懷呈龐夷簡修撰并柬張幼度 附東

臨海 陳 孚 剛中

夷簡太史足下昨得寄張應奉書識視禮部事柄鑿居  
半及讀與趙承旨詩八章又夢落松陵苔水間矣煙水  
漁村不換燕市惟盧彥威識得此意不意承旨亦處濃  
慕澹也興言及此望雲之思惟僕最切第恐執政不諒  
兩人耳外呈二詩見僕於禁直岑岑良苦夫復何言友  
孚載頓首

濫直承明署身閒似地仙雖無官長罵未敢酒家眠瘦已寬朝  
服貧須乞俸錢最愁親舍遠夢繞白雲邊  
五湖煙浪闊短棹早歸休有母思臣密無人問客周關河雙鬢

晚風雨一燈秋留取金鑾夢寒汀對白鷗

潯南書事

長洲 虞 堪 克用

偶卽潯南地川原路欲蕪老翁行乞食稚子幼難扶未放開河  
卒猶差守戍夫爲農那可卜愁我老江河

施架閣池上夜飲聯句

潘公頴明發將歸

前 人

槽頭醪醕倒不盡池上梅花開欲齊今夕好懷良足慰 穀 百年

哀樂若爲題銀燈絢 一作 席珊瑚爛 敏 綵筆聯詩錦繡迷細雨

作花簷際落 堪 清歌如縷拍中低渾忘司馬青衫溼 穀 似聽宮

鶯綠樹啼公子金猊燒篤糲 敏 美人犀筋勸駝蹏也知北海能

豪傑 堪 況有東方善滑稽腰細舞低翻弱柳 穀 手纖盃重壓柔

黃先判五夜同傾倒 敏 未信三邊尙鼓鼙倏忽年華梁旦暮 堪

風流人物晉東西江湖空闊鴻偏到穀梧竹高低鳳獨棲乘興

放船來笠澤敏散愁投轄憶潯溪襟期久矣一作交如漆堪笑

諱一作穢然醉似泥潮漲空灘移舫艫穀雨晴何處看鳧鷖會

須發達攄幽憤敏慎勿登臨動慘悽失喜今宵是何夕酒闌起

舞忽聞雞堪按敏疑公穎名然汪志則考為呂敏字志學無

居士詩集攻虞山人詩有與呂志學夜坐詩此敏即呂敏也

穀姓氏無攻又虞山人詩作穀鼓柝稿作谷亦未知孰是

營邱老仙百世師後來學者有郭熙寒林平遠世豈有往往質

本傳其疑吳與徐卿好心手貌得郭熙定真否二三隱人長松

下茅屋正對青山口前者迴顧後者恭抱琴僮隨孤童世間

豈復有此輩定是栗里柴桑翁請君更試虎頭筆為寫我像參

徐士原畫

潯陽張羽來儀

其中

贈袁子永之戍湖州三首

屠應垓

弱齡事篇翰與子諧所歡同芳握蘭蒞偶德璵與璠彊冠入鼎

門振衣陟華軒皇心苟予顧白首諒無愆風波起中道行路一

何難子行戍故越予留滯幽燕孤雲易流邁獨波不成瀾艱危

各異勢繾綣何由宣贈子別鵠操報我以孤鸞

之子產南岳倜儻非凡才荆璞夜投人按劍忽相猜禍患固有

期讒言啟之階秋風振林木蒼莽晨光開驪駒儼在駕執手有

餘哀君子敦素節在遠分彌諧小人實狗華居親志恆乖願保

金石軀不以秋草衰

清清涇水流百折猶不溜松柏有本性風雨寧瘁之執德苟無

爽患難非所期得時騁騏驥失意爲龍蛇石室無銘功名山有  
藏書子行慎自力吾亦反吾廬

同胥臺月下小酌漫書以識

施儒

袁子高情不耐炎琴書攜就法華庵深深桑圃塵蹤遠寂寂雲  
房睡味甜壁上詩篇遺妙訣月中尊俎動清酣經綸事業還應  
舊潦倒丘園我獨甘

董太史過吳門見訪

皇甫汈

子告賦閒居多情訪敝廬交因忘世滅禮覺候門疏酒伴芳林  
下琴心茗水餘還卽寧久滯明主待相如

潯陽太史見示擬大閱頌愛而賦之

蔡汝楠

玉堂朝罷自委蛇秋日抽毫賦所思細柳營中臨大駕黃花鎮

外警諸夷六軍猛氣纔能見萬乘英聲正在茲若比子虛憑獻  
納定知明主幸同時

雪中柬董編修

前人

長安羈客逢殘臘莊舄愁來祇自歌花發江南鄉信杳雪飄苑  
外暮寒多舊班無復鴈爲侶虛館還兼雀可羅君自同心最相  
憶一瓢春酒興如何

寄懷董潯陽太史

前人

天上離羣倏暮春江南薊北隔音塵論交鮑叔偏知我推轂祁  
奚不避親蒼水自隨移跡遠黃麻行見沐恩深濟時異日資元  
老莫道衰頽是舊臣

用韵贈荅潯陽太史

王維楨

敢向驂騑爭並驅天衢獨步果難如九重空愧金門詔雙管眞  
憐太史書歲月鬢毛吾入老斗牛劒氣爾衝墟故廬西嶽三峰  
下思跨茅龍上太虛

董宗伯用均貽示買山梅溪之作用韻奉懷

吳維嶽

看山清曉露華侵路入郭南洞壑深不向丹爐探大藥誰知紫  
綬背初心酒依蘭蕙多香氣琴出松篁少俗音磊落新篇求友  
切草堂今許踏花尋

奉和大宗伯董公返棹之作

吳郡王世貞元美

初疑興盡子猷還咫尺清茗未可攀日暮碧雲離合際江秋紫  
氣有無間勞公郢里歌中雪念我祇園夢裏山莫笑野人虛擁

篲至今猶自埽柴關

早秋奉候董潯陽卽席賦

沈桐

已從綠野賦歸來更築行窩傍水隈罨畫雲山聯几席繞隄煙  
樹隱樓臺楸枰乍試鶯聲囀午篆初消鶴夢迴珍重晉公林臥  
穩莫教文象動三台

送員嶠温少司成之南都五律

沈聖岐

童子論交三十年賢甥似舅復聯翩國人矜式吾茲羨宅相眞  
成世所傳舊日朋遊皆北面一時文戰有中權可思修竹山牕  
下相對寒宵擁褐眠

割青亭上立武波齋閣參差水樹多曉帳橫經深雨露秋牕讀  
易長煙蘿頻年鷗海盟難定一日鴻逵羽若何處固無心出有

南漢志 卷四十六 五  
爲應知王略在編摩

辟水滌紆面面通陪都禮數特優崇門徒惟識陽城教胄子先  
論典樂功集類飛鴉音自好談經五鹿角誰雄君行萬里煙霄  
路只在宮牆數仞中

誰是知津卻問津回瞻林鹿自甦甦君眞特達圭璋者吾乃嶽  
寄厯落人清世英雄猶□□舊京車馬豈無塵好將壯盛酬明  
主蚤共煙波理釣綸

離筵殘月夜盈盈颿底秋晴去鷁輕昔以長饑縈紱冕今從小  
草戀平生牽裾未了斑衣慕投壁偏深白水盟莫向天涯頻屈  
指秣陵雲樹總關情

聞温長卿杜門攜酒慰之

吳夢陽

知君安可使君孤兀兀持來酒一壺何謂清朝居拙宦有言今  
夜告潛夫重檐燈火風侵得小院堦除月到無笑我強稱筋力  
健出門騎馬不教扶

讀董伯念傳慨然有作

并序

黃汝亨

伯念董祠部弱齡奮跡三十登壇華胄高門藝雄詞長  
而且約身敦素士之風抗疏標直臣之節一劔足酬萬  
金立散可謂清朝之仗馬濁世之栖鳳而生不逢辰才  
不展志摧殘市虎偃蹇人龍向平之懷未紓長卿之病  
竟廢海內之士莫不憐其芳潔悲其所遭而吾友薦卿  
其舅氏也既抱才士之痛復深渭陽之情哀集遺文更  
立小傳情詞俯仰愴有生氣余于伯念氣疎跡親九原

不作手讀一過風雨淒集不勝河山之感聊代長歌之  
泣云爾

嗟吁伯念宗伯之孫給諫兒魁墨落拓聞當時一棺戢身都已  
矣千秋令譽良在茲痛君有臂不可把讀君遺事泪俱下世人  
富貴何所爲詎如抱甕負薪者生前踣厲凌高雲死後凋殘瘞  
原野古來其盡何足論但令骨朽名猶存向平損益見何遠虞  
卿窮愁遭其屯千言語主主不悟萬金散人人無恩脫屣長安  
去死路挂冠誓下辭生門生門死路空中花文彩風流落齒牙  
曠士爭誇祠部節俗人羞問尙書家憶昔臥牀對君面雙眸爛  
爛如掣電一夜西風白晝陰可憐相思不相見那家殄瘁人云  
亡束芻挂劔徒爾傷有舅文章甥不死始信情深是渭陽

留京會同館云沈萬三故居感賦

海寧談遷

雁翅檜珠子柏蓮房玉蕊醒酒石平泉草木不一存贊皇當日  
愁遷客何況當年一布衣陶朱猗頓徒陳跡華居彷彿擬梯仙  
梯仙國宮室金埒溝口洪武年名珍異寶人不識笑破石崇碎  
十尺東第王侯媿比肩驕奢已見餘空宅綠苔繡戶少人行明  
月流光穿獸脊歌樓舞榭雜飛塵遺笛聲聲怨趙倫敗虜不知  
家易盡啼鴉猶訴故園春

河南道御史公署牡丹云國初沈萬三遺種

前人

麗錦穠妝怨洛陽主人金谷早荒涼幾家富貴長春色何處樓  
臺繞古香天寶醉吟誇禁苑元和遺事記興唐  
興唐寺牡丹一叢元和中著花



南齊志 卷四十八 七  
一千二 江南花木多消歇可耐西臺老帝鄉

貽董六退周

范 洵

春來春去總無端別院沈沈獨倚闌風抑疎花仍怯晚雨撩纖  
柳不勝寒離情泣向緘中訴怨色偷從鏡裏看咫尺巫陽峰十  
二片雲還往若爲難

送顧寧人之茗上

上元 王 漢 元暉

良史才名未可刪天心命爾試諸艱休云六代較顏謝直取三  
長駕馬班燦燦春華榮槁木煌煌夏鼎燭神姦書成自指茗溪  
水一片丹誠告蔣山

君僑寓蔣山 沈登瀛按 顧先生應吾溇莊氏之聘

送黃九煙先生

吳江 潘 鏐 雙南

對酒真傷萬古心驪歌初動氣蕭森月明天與人同醉歲暮情

將海其深世路不須悲險阻丈夫應自識升沈溇南歸去還高  
臥書滿牀頭雪滿林

和黃九煙先生見贈原韻

前 人

人肉啄饑鳶兵戈正目前世情波已逝天意月將圓治亂何嘗  
定遭逢聽自然向來多感慨杯酒漫留連

花朝江郢上招同閔湘人蔣前民吳叔子集貺其堂分賦

前 人

共是他鄉客江淹喜見招冰霜矜歲月天地老漁樵才子詩千  
首高人酒一瓢芳菲今漸好莫負百花朝

同黃九煙先生及程未能江右李集蔣前民漢書屋

前 人

秋光今日似春光紅葉黃花滿夕陽天地有心酬晚節琴書無  
恙老他鄉客來茅舍塵氛遠酒蕢隣家野味香煙水荻蘆三徑  
好過門應自愧求羊

冬至同杜蒼畧黃仙裳閔湘人鄒乾一諸子餞黃九煙先

生旗亭同用首句

前人

旗亭握手盡詩人萍聚邗關快飲醅月照素心成彥會風吹華  
髮半遺民高天釀雪容偏黯大地回春氣欲新明日片帆江上  
去伯勞飛燕重傷神

白門黃九煙前輩貽詩十首口號八首答之

長洲 尤 侗 西堂

絕塞關山記夢遊黃榆風雪捲羊裘十年放逐同塵土花發江

南人白頭

天語曾傳別殿中茂陵松柏已秋風彈琴賣賦人誰問老去相

尋亡是公來詩有遭際依稀似長卿之句

少年放筆任頽唐雁字天邊留幾行不道子雲耽寂寞有人載

酒問西堂

黃香名字我嘗知何意逢人說項斯萬嶺梅花蕭寺兩南潯江

上寄題詩

知公已是古先生三十年前雁塔名老向荒村作教授角巾顛

倒飽藜羹

半生漂泊逼衰頽家在吳頭楚尾間五嶽空懷禽向志籃輿只

到一衡山君楚人而居吳有南嶽紀遊

南漢志 卷四十六 集詩一

老僧四壁畫西廂我亦秋波戲擅場君更淋漓成大首放開色

膽大文章來詩云秋波一轉有奇文君亦作六首

遲我談心二十年眾人欲殺我猶憐從今相樂還相泣慷慨悲

歌黃九煙

懷人詩九首之一

吳縣徐枋昭法

月老名南潛靈巖嗣即茗上舊名士董若雨也亂後隱

潯溪既版靈巖即嗣法與予最善向年冒雨訪予於萬

峯

茗霄多隱淪沉冥老湖浦吾子繼風流登樓掩蓬戶只此避世

翁已足高千古忽復歸靈巖棄家霑法乳出世復無倫居處龍

象伍一鳴契真如法音震天鼓與予敦素交氣味芳蘭杜奉裳

枉相存芒鞋踏寒雨何為茲數年不得親玉塵

哭徽州司理溫寶忠

郡城李令哲霜回

轟傳壯口凜如生脰絕猶能兩眼瞳妻女死方成眷屬男兒到

此是功名篋中三尺淬何銳膝下雙珠匿自口幾箇士師能抗

節頓教青史重烏程

哭溫寶忠先生

嚴啟隆

子當膠庠時與子亦落落獨以聲氣求後先非寂寞荏苒三十

載俗學驚糟粕子氣轉驍騰子文豈落魄逮乎丙子秋遭遇見

作略執手語河梁告我前夢惡前夢乃云何萬事都飲啄慰我

羈暮魂飲子清涼藥癸未南宮開子名訊豁達受令司理還顧

我念藜藿相勗有芻言相願故不薄子知我意深拊曾訂一諾

豈意天地傾宮闕成鮒涸新安萬壑中鐵騎踐城郭抽劒抉妻  
孥半世酬一鏢鼎鼎共百年斯人乃震焯

溫寶忠殉節新安族姪元爽經紀其喪率其子天璧扶櫬  
歸里感而賦此

吳世濟

天荒地老更何論千古難銷碧血痕差喜阿咸敦氣誼亂山深  
處獨招魂

聽盡聲聲杜宇啼黃山斜赴浙江西問君關外將何物百尺遺  
書一跛奚

酬陳霽山

吳江潘耒 稼堂

栗里遺民去不還剛逢一老水雲間著書富欲追繁露琢句清  
堪步小山世味淡時堅道骨機心盡後駐蒼顏五君向秀須參

預不與山王一例刪

聞董若雨祝髮於靈巖感賦

金鏡

五車猶未足方外問三車西國添高弟南天失巨儒乍聞悲喜  
集轉念信疑俱自顧頭顱直何爲遂不如  
故是再來者因緣亦會時若非天反覆未免世推移念本由忠  
激身隨以奮飛曾聞無數佛血性一男兒

鶯湖晚眺同誦孫宿宮

松陵潘檉章 力田

攜手暮何之滄茫泛碧漪迴湍激岸遠孤月出雲危蘭若中流  
動漁燈隔浦移棹歌都有意清絕竹枝詞

暮秋懷董誦孫二首

前人

同是五湖閒輕船隔往還浮雲心欲競片石影俱頑天遠歸鴻

斷門深落葉關何由見顏色佳句肯時頌

古寺松風夜淒涼醉共僧獨漉歌猶在千秋事更增新霜黃入

橘曉月白連藤不盡懷人意還思賦大鵬誦孫去秣圓通禪房

白賦大鵬遇希有鳥事見誦孫與余傾倒者至也

鄴衣至潯與談近事有感

吳江包 咸 自根

別離秋欲晚南北尚鳴笳雨闊三江水霜催九月花青溪空落日白下走寒沙逐鹿應難定相看惜鬢華

閔孝子詠

歸安吳 晉 介茲

古來忠孝節義之事並起于一念之血誠至于成敗利鈍非所計也閔孝子當父垂死而毅然剖胸割肝以救之此真足以動天地蓋古今矣而論者以父卒不起為

憾此出于孝子引慝之誠則可若旁人以此苛求則必其父永不死則必孝子先其父以死則必其父每一病至孝子一割肝而父之壽算無疆孝子之心肝有盡而空腹槁形以死非篤論也世界不墜賴此等人凡有心者可無詠歌以永其事乎汪志按晉撰閔孝子傳云父病霍然而此云父卒不起互異

墨胎叩馬諫不能挽頽商武侯出師表無裨漢淪亡事皆人力所難濟師心創獲奮若狂深悲極痛在一時千古藉以維綱常世儒理道膠心腹周身矩度安且詳動云守身以觀變作事無令元氣傷一朝時艱及勢阻依違傳會多傍徨坐令大地病頑懦盧扁無以起膏肓寒夜挑燈論今古如意敲碎愁茫茫吁嗟

乎閔孝子目不見書史口只談農桑披肝瀝膽奇絕事胡爲乎不在通都大邑而挺生于寂寞之窮鄉吁嗟乎安得一掃天下學士大夫奄奄泉下之習氣而徧灑以孝子熱血之一腔

袁孝子詩

嘉善 沈 裘 燦 英

孝道本庸不尙奇奇處偏從真處爲創格一空千載上區區只有鬼神知吾聞汝南袁孝子清操往往聞鄉里早年喪偶王維楊同居有弟姜肱被其他志節難具陳感天孝行情彌真孝子少年有奇遇道人持贈醫家具金刀銀鍼及仙方但云寄汝杳然去種就杏林家漸充自謂奉母免尸饗豈知奇遇非偶爾曲成孝行荷天公阿母抱病病綦篤呼天搶地嗷然哭倏傳夢語病可蘇不是龍肝命不續孝子聞言且忖量徧訪醫書總未詳

世上人間無此藥我欲求之誰可告念我生庚原屬辰龍肝直欲取諸身況逢仙授有金刀仙方鍛鍊有神膏取肝憑仗仙人力非此何以報劬勞宵來歸向房中宿對天坦露皤然腹持藥持刀默禱天割然一割隨瞑目氣息奄奄一綫爭空中彷彿有人聲爾欲取肝肝既有醒來伊喔聞鷄鳴俯視胸前血未乾突出猩紅半片肝奇哉肝若從天與縫卻創痕勉強起嗚呼噫嘻袁孝子古來剝股能有幾況是剝肝不顧身母子安全俱不死豈忘髮膚在歸全當日專求母病痊療得膏盲心願愜頓忘曾氏頌冰淵此事隱諱密且周強自支吾舒母憂親戚兄弟都不聞從此增年到白頭竭來潛德祕莫宣剝口淋漓未泯然一朝顛躓傷痕裂元神未復轉纏緜醫來那得知其故再三叩詰稍

吐露此時子弟皆在傍耳聞不覺淚如注孝子還恐母心傷戒  
言慎勿語高堂醫者大聲告親知非常之孝人難為一時傳誦  
到官府縣令羅公深異之到門訊驗長太息急急表揚違敢遲  
官司旌額重紛紛大書特書志乘文要使維風且振俗絕裾之  
子聞未聞孝子初心不及此祇求療母延暮齒母體差安兒亦  
安外來旌揚何足喜孝子盡孝不愛身愛身便不得其真區區  
一心聊自盡為智為愚向誰陳

南溟田烈女詩

錢塘厲鶚樊榭

儂住溇溪上郎家共里閔掌珠祥入夢冠玉弱知名半面期幽  
壤雙飛誓隔生朱絲曾約髻畢命託精誠

贈董君性存疊前韻

即贈董傳經嘉定錢大昕竹汀

幾時消息到秦樓容易韶光春復秋半甲赤繩遲繫足十年黃  
卷負埋頭還家有夢身仍滯旅館思親淚暗偷老我境窮君莫  
問商量拚醉掃頑愁

五君詠

錄二

歸安嚴遂成海珊

元晏叩其刃昇之溺於水云何遭斯疾夢夢窺天咫昔人廢蓼  
莪今人廢芣苢董扶搖遺惡疾多年而卒

算盡復誰代並舉枝連芬樂為哀所奪起起龍蛇聞九原不可  
作誰歟定吾文董渭瑄兩子相繼歿甲子兩子同登賢書

贈溇溪董承餘秀才

前人

紫駝之背峰儼如望而知其為承餘對人默塞數龜息市上禹  
步姑徐徐置之邱壑入畫格枯木竹石神清虛平生多病病亦

善前讀前漢後漢牛溲馬勃敗鼓皮入手幻成錦繡段江楓  
霜赤鱸魚香一牛鳴地潯之陽片帆刺岸舍館定流汗奔琢根  
瑯琅統如鼓殘壁燈滅三點五點懸星光搏桑日出人鼾睡履  
聲橐橐聞繞牀主家老嫗竊相謂謂此贏者無乃狂聞我打包  
告歸去意殊戀戀無別語目送孤鴻啣葦花飛入煙深不知處

懷人詩六首 錄一

前 人

雁聲吹墮朔雲堆髯也無年首重回昨歲似聞中散病青山不  
待巨卿來破除生業書偏富慰藉人遊子尙才地下若逢姚合  
逸山間黃蒿如柱粉如灰 謝散木余在山西聞其凶問

前懷人十六首 錄一

前 人

沈沈兵衛寢凝香巾角彈棋妙擅場從小便知偉節怒老來始

悔次公狂

余行

空池舊夢無春草散木

別字

孤墳又夕陽生怕

絕交書不免竹林例得斥山王

董芭堂太守潯溪荷花池余妹壻董經遠所居與羣從唱和處

芭堂年最少氣適上雅以奔自負余被酒亦得狂名皆與謝三  
文若善今風流雲散或墓木已拱而余老矣芭堂新遷武定

病鳳謠爲建平公舅祖作也公氏陸名士涓庚辰進士以

建平縣知縣罷歸余少頽放不爲親族知識獨公獎借過

當於其病廢謠此以唁之

烏程 凌樹屏 保釐

有鶴生東南冰魂而雪魄賦形苦不全曠懷寄廣漠瑯瑯躍叢  
林斥鷃互相嚇獨有威鳳姿乃復頗相惜謂鶴本凌雲胡爲落  
空碧努力願自愛慎無失所託一朝騰輝光風塵安可縛鶴時  
聞此言感泣淚潛落舉首爲長鳴面承色無作不料丹穴王漸  
苦小兒虐雙飛橫九州宛轉失其隻爾來未十年旋復傷兩翮



兩翮縱已傷神明幸不惡頗能識妍媸定勝彼啞啞眾鳥且勿  
誼讓渠占阿閣鶴亦從之遊羽毛待梳掠

顧節婦潘氏

前人

清秋徂東訪舅氏吳興老翁迎門窺手持一卷冰蘖字授我乞  
作節婦詩我詩要為不苟作安能鑿空言支離篝燈午夜輒捉  
管知翁真樸不我欺節婦之節果誰右一百年來嗟未有門楣  
曾託安仁家生世空為彥先婦願隨弱壻拚紅顏定為孀姑成  
白首未亡仍在立孤難有終還代懸封厚哀鵠茹荼兩不疑縷  
覩懿行夫豈私我覽此卷三歎息窮鑄敢惜孱豪施因思我舅  
有世母余外祖妣陸太孺人  
葬三喪亦與節婦同高節合與相扶持昌黎不作隴西  
逝更誰傳此磨穹碑

送董生歸南潯

前人

董生囊無陸賈千金裝亦不至家徒司馬四壁立愾然捲被辭  
弟昆從我秀州把古汲汲古亦何好我方窮餓荒江道董生此  
意良獨堅萬眾不挽出峽船媿我於生了無益紙窗相對徒逼  
窄又恐明年捉將官裏去欲倒壺盧向誰擲丈夫有志事竟成  
積絲為錦莛化楹柯古小年還作劇達夫壯歲終成名尊聞行  
知古有是人生何必常相處西山有白雲南雪有幽渚置身於  
其間足可窮豪楮感生殷勤為生云雖復老生之言差可取臘  
月遄歸且閉門磨穿鐵硯彼何人何況生是詩翁之子尚書孫

壽董南谷孝廉五十

前人

老息圖南翅相看鬢欲皤淵深繁露學愁絕采芡歌前輩風流

在平生意氣磨幸逢覽揆日一笑失重疴

失喜神猶王應憐志已灰那堪貧復病空負望兼才有鬼長摩

足沈舟自過梳壽垣列三宿謂臯懷差復慰崔隤

哭董南谷丈

前人

間世董夫子今成汗漫遊龍頭先喪管鼎足竟亡劉丈嘗言吾

人郡城以東勢分鼎足其一蓋自謂其餘則嚴望都遂成及子書祇供兒讀文終為鬼口名題

鄉進士口末也應愁

送陸生嵩高歸南溟

前人

送君逢至日媿我尙離羣別緒愁添綫歸心卻望雲便嗟遊侶

盡都恐惡言聞好醞南溟酒明年此共醺

董若雨漏霜茗帚遺像是呂海山所畫烏程嚴可均鐵橋

風景河山劫後灰小庵豐草破書堆祇應淨掃興亡恨安穩蒲

團入定來若雨名說後為僧名南溟有豐草庵詩集

蘇臺柳枝詞和周雨舫

烏程陸樹德滋田

長洲苑外雨空濛短簿祠前鬪晚風一路笙歌人不見畫船多

在綠陰中

題周君雨舫遺照

郡城高湘蘆洲

長松百尺撐青天飛泉萬丈懸秋煙高風古意沒幽谷無人省

識相留連周子瑰奇清且賢枕流漱石塵中仙棄置草中雜瓦

礫璞玉居後燕石前溟南無屋家無田磬懸壁立常蕭然偶爾

揮毫出新意閒雲孤鶴爭秋妍與余相識十餘年彈棋讀畫相

周旋姑胥臺畔生公石坐看浮雲過眼邊今君先着蓉城鞭我

獨困守塵囂緣忽展此圖覲君面淚珠迸落如流泉疎林修竹  
水清漣恍猶相對鳴朱絃君試開軒掃花徑我將追步同高眠  
雲山縹緲景澄鮮靜如太古天始全君能作畫我飲酒萬事悠  
悠盡棄捐

題董鑄范丈

蠡舟

冬釭永慕圖

德清

戴

蕤秋憶

寒雲沈沈壓茅屋屋裏寒燈耿一粟有人病骨方支牀悲從中  
來淚盈掬悲莫悲兮護花傾北堂日冷風淒清斷機殘綫盡無  
恙母氏遺跡猶分明嗚呼此時此境難為情  
哀難忘寓以畫此慕成終天天心亦何隘寄我斯圖託雙鯉使  
我淚下不能已小人有母病不起奄逝已經隔年矣天板板空  
號呼形杳杳空追摹篝燈猶憶教之無每一回憶淚眼枯傷心

況復披君圖

此恨竟長抱天道真休論此身更何事足慰泉下人祇餘顯揚  
志萬一酬親恩讀書致身期有補走肉行尸安足數不然閉戶  
勤清修曾史卿雲並千古紛紛世俗聲利儔將無貽親之羞忝  
厥祖嗚呼此念良可悲無此一念生奚為燈光黯黯藏深帷思  
君之慕重自思探懷伸紙抒哀詞然乎否乎君思之

題汪謝城

日楨

詩集

海寧

許光清蕙那

歡愉辭難工詩工多在窮古人雖有言要由遇不同我懷昔湮  
鬱讀書君見疑君情今感慨乃于詩見之交遊共推服題語致  
稱揚豈不能附益知非君所望詩本道性情可以當晤言書來  
有此語我亦以為然君意探絕學不苟事詞章經術既挾奧推

步復求詳而我慵且拙百棄百不成一語還詢君何執以成名

楊秀才 鳳苞 遺像陳上舍經索題

嚴元照

碧梧萋萋高十尋書窗日午常陰陰誰歟撫卷此晏坐太息斯  
人空苦心撐腸磊落書萬軸語笑從來不諧俗槃中鮭菜三韭  
供鏡裏頭顱十年禿仲翔元是老經師東野諒非軒冕族恨無  
定本傳千古剩有詩聲馳九牧我昔少年有狂名意氣往往陵  
公卿便民橋畔識君面 君居南潯 君正壯年已老成窮龐豈足  
當大敵見君敢不跪且擎菹畦老去王 豫姚世鉅 死吳 孝廉蘭  
庭史丁 教授杰 經皆已矣作者何人識古風此老無慚稱繼起  
誰向襄陽訪耆舊他日豈無習鑿齒訣別城南日暮雲 去年春  
疾入城君訪予寓 樓此後不復相見寢門一慟死生分門生尙有侯芭在更買青

山爲起墳

上舍頃謀買地歸雲庵側葬君

題湖社懷賢圖

前人

郭外林亭好當年有勝遊浮雲辭冕紱佳日愛春秋枌梓流風  
替丹青小劫留因懷趙徵士終老狎沙鷗 鳥程趙徵士金隱居南潯劉顧兩尙書招  
之入社不赴事見靜志居詩話

沈秀才 畦 書來言於道場山訪得明溫忠烈公璜之墓作

詩寄之

前人

勝國遭末造吾鄉三忠臣 烈愍公覺 先而凌 忠介公義渠 後復有溫推  
官推官殉徽州妻女皆投繯碧血之所闕乃在城南山實惟不  
食地平曠無林巒哀湍自響谷荒草長於人棚民所盤踞狂鼯  
作比隣幸有道旁碣大字猶未刊 碣云明崇禎癸未科進士文林郎徽州推官寶忠溫公夫

妻母女同殉國難之始知一抔土中藏萬古冤歲月幾遷賢百  
 墓姻眷弟吳時亮立有七十年夜雨泣山鬼麥飯無耳孫好義有沈子家在何山前  
 百里叩蓬闈為我述所聞中酒不能飲涕下紛潸潸再拜告沈  
 子及此墓未湮願君策杖去勿惜登頓煩沈子領其頤歸去不  
 浹旬書來無他語此事覩縷陳言曾挾山僧窈窕尋澗源拜起  
 徒仿惶夕陽在榛菅四顧莽無人芻蕘無可詢開緘再三歎中  
 夜寢不安忠節孰不欽況在鄉先賢春秋感霜露無人薦蘋蘩  
 是固吾黨責檢校諒不難礪瘠二三畝買以充祭田年年寒食  
 雨煙柳搖春妍招要同懷子一尊酌墓門實惟重名教非徒慰  
 英魂吾病久憊憊茲懷尚勤勤裁詩報我友知我所思存空言  
 慎勿嗤余襟良已殫

題潯溪雙烈圖

閩縣 沈瑜慶 愛蒼

烈女姓孫雲亭之女庚申粵亂年皆及笄隨親避兵鄉  
 間旋寇至二女同時投河自盡寇退得二女屍竟聯結  
 一處遂合葬焉其父繪圖徵題以誌哀思

古井千秋定不波廿年空谷記牽蘿賢翁大有傷心處未忍丹  
 青着墨多

路繞茗溪日又斜天南烽火客無家里閭未改承平舊零落春  
 風姊妹花

恩勤風雨感漂搖翦紙幽魂尚可招不枉女中能競爽哀忠竹  
 帛太平朝

犒軍簪珥信州城天語猶嘉大義明  
先太夫人佐先公信州城守奉旨有深明大義之獎

事有至難天幸爾

黃山谷中與頌詩句

為君振觸寫雙貞

題前圖

吳縣

吳大澂

清卿

回首庚申事可悲從來巾幗有鬚眉南林河畔斜陽路應為雙貞豎一碑

彤管流芳志乘誇披圖老父尚咨嗟秋風秋雨啼鵑血點滴庭前姊妹花

題吳興朱稼軒海角圖

平湖

劉其清

蘊山

江山如待我萍跡暫勾留此外疑無路何人獨倚樓途窮天地小潮撼古今愁鄉國頻回首蒼茫雲海秋

味古太世丈偕張少蘭凌塵遺枉過寓齋適少泉亦至即

同小飲喜成二律

婁縣

戴羲

黃谷

蓬巷蕭條生事微攜竿日向釣魚磯蘆花秋岸鷗相狎楓葉江

村蟹正肥幽客忽來新舊雨小窗共簇畫圖圍

太世丈少蘭塵遺皆精鑒賞索

余舊藏書畫展玩竟日

逋翁老去清癯甚梅鶴翛閒好息機

故鄉一別幾經年中酒情懷各黯然短褐杜陵嗟落魄長齋蘇

晉愛逃禪

塵遺是日持齋

籬邊黃菊田園夢江上紅旗鼓角天聞道婁

東連報捷幼安喜欲舞尊前

時瞿城初復進攻婁東

奉題董小颺所藏頻羅庵燼餘印痕

羅振邦

友蘭

君家文敏有書癖摹古直奪古人席今君鐵筆亦入神置之秦漢幾亂真天寒歲暮來乳水與我論交獨知己袖中忽出名山藏五雲煥作雲霞光名公鉅手爭點筆寶勝梁家未焚日我慚老大百不能敢令燕雀追鷗鵬詩成一笑為君寫何處飛鴻鳴

月下

題梁氏燼餘印痕冊為小帆作

德清戴銘金 銅士

石交當日締頻羅 山舟學士自號頻羅莽主 紙角鈴紅感舊多 黃小松司馬奚鐵生處士

陳曼生大令 俱歸道山 鐵筆忽遭回祿厄幸留拓本重摩挲

紀董謂瑄董蠡舟藏書

長洲葉昌熾 菊裳

太卜三夢先致觴鄭人訟鹿更迷離撥灰縮粕何須爾轉瞬鐘鳴欲覺時

兩浙輶軒錄董熈字謂瑄一字訥夫烏程人諸生雍正甲寅薦博學鴻詞著南江詩文集陳世修序略曰謂瑄沈靜嗜學家富藏書又嘗遊其外王父曹秋岳先生之門倦圃所藏人間不經見書謂瑄獨窺之故學有原本昌熾案倦圃之壻名

師植字聖衣一字汾園烏程諸生亦見輶軒錄 張鑑夢好樓記周官太卜掌三夢而列子六候與經不異三曰思五曰喜其為氣淫於藏則有餘於內不足於外一也里中有沈默之士曰董子鑄范讀書志古不慕榮祿於書靡不窺而猶病其藏家之少閱市之淺顏其所居之樓曰夢好棐几竹榻百城南面以寄其深愛篤嗜之思 又云自宋歐陽氏信齋然日本古文之說而後之託安國孝經以暨毛漸三墳豐坊魯詩不一也以子之夢其必撥灰縮粕神遊域外將遠駕乎皇侃論語義疏七經孟子攷文之足貴不大快歟 又云余曩在琅嬛仙館校文瀾閣未收之書得百有數十種皆非世所經見心欲抄其副而苦無力然則余之校不過一夢而子今

之夢又焉知不為得鄭人之鹿者耶鑄范名蠡舟烏程人為  
余同年雲帆先生子世家舊姓近見其藏書目所得蓋不少  
矣遂為之記

紀劉舜輝藏書 前人

社酒唐華憶討春舊遊如夢復如塵蛛絲馬蹟緣沿得好鳥飄  
風變幻頻

兩浙輶軒錄補遺劉桐字舜輝一字疏雨烏程貢生著有楚  
遊草楚遊續草聽雨軒稟 張鑑暝琴山館藏書目序疏雨  
雄於貲而多家累年未三十即棄舉業遠遊楚余課誦其家  
積十餘載之久疏雨歸則與談杭州谷林堂趙氏暨揚州玲  
瓏山館馬氏之耽書好客未嘗不神往焉乾隆壬子癸丑間

疏雨既以藏書自任吾湖固多賈客織里一鄉居者皆以備  
書為業出則扁舟孤棹舉凡平江遠近數百里之間簡籍不  
脛而走蓋自元時至今幾四百載上至都門下迨海舶苟得  
一善本蜘蛛絲馬蹟緣沿而購取之故吳門萃古齋既名聞當  
世而下此如竹垞經義攷所云坊朋買友亦不可枚數疏雨  
既好書而余又適館其家堂構閒曠每夏秋之交設長筵廣  
座名花異卉駢列左右主人命門者延若屬呼僑嘯侶至即  
十餘輩余課經之暇亦相與商榷是非書既山積真贗參半  
鑒別不易其時同人之與疏雨洽縞紵者如楊秋室范白舫  
計秋琴蔣嗜山間亦過從或有所得傳觀以為賞析自此疏  
雨之書固已不啻數萬卷矣如是者有年適值盧氏抱經堂



吳氏瓶花齋讐校精本散出四方於是疏雨所收之富又越從前數倍癸亥之秋一病遽歸道山其家不能收拾子幼爲人熒惑舉十餘萬卷之書一旦畀之他人秋室題其身前訪書圖云自古圖書厄多經劫火亡未聞豪賈奪舉作債家藏洵實事也飄風好鳥變幻若此斯可歎矣今年余病肺倦遊過白舫齋頭則所藏舊目與估估帳籍宛如昨日痛盛遊之難再悼勝賞之莫償失今不治并有與此目同歸漸滅者因破十日之功與白舫秋琴嗜山訪其大略編爲一目知其中實有足以備金匱石室之講求啟陳農苗發之夢想者豈第王涇大唐郊祀一錄同於煙銷灰燼屈指其間不過二十餘載世故之難問已如此之速可勝道哉此書之失不特吾人

同社眼福之薄卽謂吳興山水精英不能蘊此奇觀以供後來之挾摘奚不可也疏雨姓劉氏名桐援例授州司馬瞑琴山館其所居東廂藏書之地 王翰青鄂舟過劉疏雨書齋詩幾年羈旅隔天涯心每相親跡甚賒衝凍徑來謀社酒討春先喜見唐華水精簾卷明於月雲母窗虛白勝紗裊拙定慚珠履客墨莊偏許問籤牙 嚴可均題劉小夢憶書圖冊君家疏雨吾好友積書之癖與吾同別來江子亭邊樹終古山陽笛裏風人有微名都折福世間豪舉總成空祇今說着眠琴館卅六年前一夢中

白舫仁兄工詩餘屬製花笑頤填詞圖復賦一絕句嘉慶己巳仲春作於漢上之聽雪樓

按圖藏慶雲處

黃均 穀原

南溟志 卷四十九  
湖山石畔隱花移  
梳茗爐香琢句時  
爲寫桃腮紅欲笑  
分明解唱藥莊詞

題范白舫花笑頤填詞圖

章藩山甫

好花一笑思愈鮮  
知君詞與花爭妍  
問花何笑笑君癡  
癡吟花裏輒晨夕  
紅雨亂飛茆檐春  
閉門卻掃霞牋擘  
平生美好百不知  
正以嗜古成貪癡  
吳興記錄手編輯  
珠囊珊瑚網收靡  
遺等身著作樂無倦  
直欲磨穿青鐵硯  
人生精力能有幾  
安得恣君苦研鍊  
況我與君家茗溪  
胡爲遠遊來蜀西  
君不見清遠湖山  
入畫稿水晶宮裏  
歸去好何如高挂  
洞庭颿長作吾鄉  
風月老

南溟志卷四十八終

南溟志卷四十九

里人周慶雲纂

集詩二

寄趙承旨子昂

龐樸

女蔓垂垂覆屋濃  
疏窗支枕日高春  
鷓鴣冠依舊貧無恙  
猿臂何妨老不封  
狂汎五湖烟景濶  
笑歸三徑世情慵  
君家礪閣尤蕭爽  
偏我頻來愛獨鍾

出都門答陳編修用來韻

前人

君重玉堂選余慙  
金馬仙尊思南國  
味柳愛北窗眠  
白髮投狐筆  
青山挂阮錢  
剡溪何望賜蓬舍  
五湖邊夙志惟謀  
遜今憐晚乞休留  
侯終隱漢殷士盡  
歸周君母歡多

壽余鄉報有秋巖廊俱稱意先去伴汀鷗

題仲姬墨竹

管道杲

至大二年四月二日吾妹魏國夫人仲姬見訪於南溟里第宴坐君子軒夫人笑曰君子名軒何以無竹爰使女奴磨墨寫此幅於軒中夫婦人之事箕帚中饋刺繡之外無餘事矣而吾妹則無所不能得非所謂女丈夫乎為吾子孫者可不寶諸他日妹丈松雪來看當可乞題詠也

綠窗無長物樹蕙與滋蘭光風布淑氣揚揚畹畝間窗外何所有修竹萬千竿密葉敷午陰勁節當歲寒方欣同臭味且以報平安吾妹忽來顧綠紗生薄寒幔結貽佩纒重重青琅玕寫真

一揮灑翰墨猶未乾古意鎮長在高風渺難攀況有斐比德懿名垂不刊

聞嗣成孫被放後往遊泰山喜而作此問之

董份

爾從被放過東蒙計日遙登泰岱峰吳觀試曾看白馬秦松尙復繞蒼龍瓊碑十丈那無字玉檢千年自有封策馬徧經探篋處射牛應可得遺蹤

幽居言志

前人

南國有狂士投荒世無憐屏居非自謝顧侶虧周旋鴻鵠本不遠眾鳥啗孤鶩物性各有適志意兩不牽中路忽進退無常羣所嫌絕引特易事正爾難獨捐嗟予慕通達失據時顛連云胡

南華志 卷四十九  
已違棄依依望能援詎謂才有取要是義自賢微衷良不偶感  
嘆情難遷有生射蓬矢天隅歲空延孱弱懼易朽徒負少壯年  
明時正更化禮樂何彬彬維新介聖慮萬幾方精研遭逢閒垂  
古何幸今觀瞻嘗聞制作理深仁兆其先垂紳拱玄默百職司  
存焉淳風在厚養精神用匪偏昔人專擇任得一萬乃兼願言  
臻至治行慰溝壑填居卑事易忽地遠嗟誰宣職當樂幽居勿  
使外好纏至樂理無擇靜觀得所恬深春萬物熹媚我以眾妍  
閉門晝寥寂頽然對楹軒林鳥聲屢變悠悠與化參我心不自  
知借爾代我傳天機在耳目冥莫未能言采真足自老此意君  
勿諠

甲寅春見一童引瞽者入市人皆侮之有感而作以示吾

兒

趙金

人見無目人羣然怒而詈我念無目人猶能不自棄談星兼賣  
卜得錢了生事海上多風烟民苦征役累翻憐瞽者爲閒居猶  
高致吁嗟青年子宴安樂所嗜不學心聾盲徒爾費指示論道  
常解頤蚩蚩若昏睡戒爾當自新勿與聾盲類

郊居

前人

自愛閒居卜近郊獨將心跡寄衡茅桃花水泛魚吹浪芹草泥  
香燕補巢雜植桑麻供國稅細分杞菊入山肴平生方外誰爲  
友冷澹雲霞信可交

被罪出都言懷

董嗣成

吳楚飄零一逐臣艱難國事總傷神扁舟已逐鴟夷興萬死猶

存馬革身易水寒風愁送客薊門春草解憐人輕肥金紫從他  
美龍性由來豈易馴

五斗初辭暫息機緇塵不遣傍荷衣眼中軒冕非吾樂夢裏溪  
山與世違楊柳和風催驛騎桃花春水上漁磯浮家早結玄真  
子共逐灘前白鳥飛

茗雪逸仙歌

前人

心山趙翁高隱先輩也自號爲茗雪逸仙蓋庶幾黃孫  
者倫歟余與先生爲忘年交十載前曾爲賦此稿已脫  
未及錄也自計偕別先生歸而先生沒矣遺命尙索余  
詩其嗣子石澗君持舊稿來致先生之命覽之泫然出  
涕又怪舊詩不可讀遂爲別撰一篇亦吳季子挂劍意

耶

汪志按青棠集無此序又詩  
中刪去六句今從墨蹟卷子

吾聞天日山高三萬六千尺雙穴澄泓天眼坼湯湯兩道趨吳  
興青天蜃氣時騰擲匹練奔流直東注下會潯川一曲蜿蜒凝  
寒碧綠樹蒼林亘冬夏寺鐘漁鼓通晨夕中有仙人廬其旁薜  
荔爲衣芙蓉裳曾向長桑乞得上池水視人能見垣一方朝采  
五芝暮拾蕨煮來白石片片充飢腸數椽茅屋閒吟嘯五湖煙  
月供徜徉胸中一一爛星斗淋漓泉石筆下走鑿坏不迎結駟  
車有客常過問奇酒架中多貯鄴侯書門前盡種先生柳年餘  
八十尙爾醜朱顏清溪日日拄杖聽潺湲不是歲星隱金馬但  
見紫氣滿函關函關青牛一去後華表千年白鶴何時還自我  
之出風塵隔自君之往煙雲寂遺得詩篇不忍看爲君復裁新

詩兮長歎息狂歌忽憶黃公壚月明愁聽山陽笛

亡兄伯念儀部壬辰以爭國本被放三十二載矣茲得尙  
寶卿之贈感淚交集成長句二章

董斯張

久罷鳴琴泣逝波俄然顰帶及煙蘿先皇遺誥真無忝隔世精  
靈奈汝何臣死不隨春仗馬君恩還比夜舒荷試將遺疏齋心  
閱猶覺風霆亦護呵

先把當年逐客旌天心似見藿心傾金魚身後曾非望玉塵埋  
餘凜若生浮白汝今誰與其剖丹人恐不如兄懸知碧血乘箕  
去也伴前星做月卿

旌志詩

前人

歲在丙午子第五兄幼函疾且殆吾嫂茅也刲股爲食

蘄生之嗟夫嘉耦曰妃倫維首屬世風波逐大義誰闡  
夫其婉嫵妙年出自高族而慨然含毒茹楚矢報所天  
此其堅貞旌操奮志誓死豈第帷帟之情兒女子常態  
耶天道茫昧云胡勿援人隨琴絕禍之已甚爰綜其終  
始勉綴斯詞稍極哀怨之致焉

蒼林蔽陽景崇岡慘陰霾原野曠蕭條清蟬驚且嘶南國有靜  
女終朝閉深閨太息復自陳賤妾多苦懷昔年十四五自謂碩  
且頎姱容粲明眸秀頸若鮮卑左體襲木難右體被明璣習彼  
傅姆訓兢兢行露詩十六猶未笄十七爲君妻緩步入君門中  
庭樹桂枝綺疏延清旭高樓下臨谿錦衾間角枕華燈照層闈  
柔情婉以變獲奉君子儀君子素開美跡弛稱妙才焜耀丹霞

裳皎潔青雲衣腰間墨陽劍前後流光輝女蘿亦有根高松亦有柯蒲葦締綢繆盤石牢不移離離雙鳳凰兩兩鳴相諧夫君且安坐聽妾前致詞懷安實敗名古人有良規維子邁多難家聲日成隕努力讀父書中饋妾當治良人語我婦卿言信足師下里尠見聞吾將遠行嬉遙遙入京國我行卿可隨堂上有老姑短髮亂於絲餽飽卿勿慮娣姒羅中帷別時再拜言一歲還復來來爲老姑壽祝姑日康熙賤妾乘魚軒驄馬觀郎騎和飈叶玉鸞朱光曜金羈壯哉帝王闕崢嶸何崔嵬崇臺倚蒼冥上樹九丈旗蘭宮達芝房杏梁接文樞千門復萬戶列肆陳瓌奇軒蓋揚黃塵意氣逸路遠共君睇繁華貞靜恒自惟生兒名阿麟吉夢維熊巖夫婦笑相向今者樂何其輕舫泛故土澹澹隨

風移萱草鬱青青謹娛良不貲賓客闐廣筵賀子早還歸爲客烹肥豸肴核紛難齊出君荆南酒蕩漾白玉卮吹笙復鼓簧填篋交參差晚晚日云暮歡餘旋致悲洪濤激平陸禍至無端倪獻歲春正月邁疾俄在斯纏絲忽逾旬骨立神亦疲豎子居膏肓主人命將危臥蓐經晨夕痛子枯形骸筮短龜何長皆言不可爲枹鼓勤靈覘藥餌疑羣醫此時心若然萬術窮何施賤妾聞遺語人肉能療羸百身如贖君糜軀奚足辭手攜金剪刀悲極莫能持揮刀剗素膚或恐旁人窺斷割豈不苦所嗟肝腸摧碧血染輕衫含辛持作糜進君君不御妾身將安依良人易簣頃嗚咽語復遲細君無我悲命也其何尤我有阿母存溫清幸弗虧弱息方在抱藉子終提攜擊涕爲君言寸心矢靡猜與子

南齊志 卷四十一 六  
同一體中路長乖睽請君勿顧妾君去妾且追躑躅呼皇天泣  
盡血繼之日月黯其光川爲咽不波千秋一相訣執手從此離  
禍兮誰所胎疑召鬼伯催魂魄散四野招之茫無涯棄置室與  
家恍惚鄰妖魑九京窅冥冥安得有曉時願攀迷穀樹使君重  
來茲阿麟隨婦行呱呱索父嗁撫棺一長號長號將自裁老姑  
前搥胸婦胡不再思子言猶在耳衰年迫崦嵫弱息才一週顧  
復當賴誰長跼起相謝義訓寧敢違請今毀故飾升樓去其梯  
繡襪羅衣裳一一捐塵泥朱扉刷白堊元帳易素幃理妾篋笥  
中七寶璫瑁釵感君舊相贈物在人已非惇惇歎獨影緘閉無  
復開夫君夢中見宛若平生姿丙夜起徬徨孤坐還成疑昔時  
鳴倉庚倏忽聞莎雞追尋歡笑端慘慄增余哀上者奉衰姑下

者鞠嬰兒妾心皎如日慰子長夜臺妙齡失所援同穴以爲期  
椅桐高百尺乃生南山陲修榦拂元霄孤根託層厓斲成瑟與  
琴朱絃黃金徽發爲清商曲淒惻孰者知清渭流春冬寧與涇  
水偕哀鴻西北來翱翔以徘徊行人不忍聽況余親宗支染翰  
作此歌未歌淚先垂

垂白行贈詹淑正

詹故爲伯氏客  
工篆籀之學

前人

詹生垂白忽來訪使我低頭三歎息依稀十五年前事鬚髯戟  
張鬢猶黑雕蟲舊業今未衰驅馳東土不遑食懸河之口駭四  
坐是翁矍鑠尙多力破裘穿履墊角巾不念在家妻子貧王門  
曳裾寡心賞空懷劍術何處陳我有阿兄重意氣與君一見相  
情親死逾九秋猶無墳中路天折多苦辛螺杯流紅淚如霰我



爲其弟君其賓世事變幻若泡影榮華凋落安可論生前斗酒  
且同樂湖海會合原有神君今北向秣陵寺五更鐘鳴愁殺人

白鶴行贈周虞卿

前人

虞卿乙丑春七袞矣昨三千里謁里中相公遇殊厚比  
其歸猶甌塵余哀其老而窮愁爲作白鶴行弔之昔人  
以青蠅弔往今以白鶴弔生試令樵青作淚妝歌一闋  
老周郎當一顧否

白鶴雲愁渡江面鏡前吹盡梅花霞但見蠨蛸當戶織紫錢滿  
庭沾不得寸田尺宅春茫茫七十老人歸自傷往年眠雪幽州  
市丞相款扉屏掾史高軒卻自朝天至醉魄如山搖未起有脣  
那學君卿癡五侯何物絳雙肩歸來解裝諸女問老骨虞翻凍

堪忍囊攜河上一編書蹇衛馱還不曾損楚萍泛雨命若烟偷  
兒猶妒王家甌夢回劍折夷門道俠客精魂道邊草石頭鍊出  
穠華天桂薪剛遣侏儒飽漁蓑壓船當敞廬只網珊瑚不網魚  
鮫人瀉淚一萬點化作金醪青玉盃幅巾斜聽黃鸝晚

哭雲棲大師偈

前人

出家五十有餘年七尺繩牀坐欲穿今日問師何處去山僧嬾  
到寺門前  
芬陀供後入龕時萬五千人淚不支天樂妙華祇這是人間爭  
覓沈蓮池

溫長卿以宗伯兼領史局歌以送之

前人

二十無聞一狂者湖上逢君入秋社傾心相向兩不言日氣青

蒼霜洒洒對君岸  
幘復長嘯禮數寧  
為我輩假論詩  
啜茗初夜分談快  
干迴呼玉笋生  
公石上蘇家隄  
何處聽歌飽游  
冶留連豈落兒女  
態感慨遙令古  
人寫拏舟送余  
今幾時谿聲宛  
在浮圖下余嗟  
已廢無可言君  
亦暫爾娛丘樊  
爭席尋常聞野  
老客來頻乞南  
宮草帝方側席  
思賡歌寅清有  
命新嵯峨君行  
遲遲無不可青  
海尚腥其奈何  
賤子不能與君  
北晴江祖帳君  
為客岸花冪歷  
搖紫烟解袂青  
林鳥將夕謁罷  
承明拂几塵侍  
兒然燭留餘春  
淋漓灑氣兩朝  
史墨兵字字垂  
琳珉其間要立  
逸民傳寫寄吳  
山采藥人

暮秋同趙長文夜集忝公精舍得衣字 前 人

竹菴立窮渚隣社往還稀  
偶伴野人至坐聽秋葉飛  
僧厨餘午

鉢佛火近寒衣妙理從師悟  
猶憐帶月歸

春日得朱相國手書兼致大貺寄謝二首 前 人

元臣領史天章重錫馬  
曾經晝接餘文武家風  
姬旦禮古今人表孟堅  
書星垂上將懸中斗嶽  
到高山俯石闔獨有孤  
生寒似竹也煩槐鼎問  
何如

二月餘寒雨未晴  
瓦鐺石火煮黃精  
鶴從日下傳書慰  
錦賚天孫照眼驚  
不負萬裘酬夙志  
宛如三揖費逢迎  
儻然病起應西笑  
翠樹蔥青賦擬成

壽朱少師七袞 公孤辰當元日 前 人

謾謾風澄百尺松  
獨持經術補山龍  
北辰玄默尊魁柄  
東序清嚴列大鏞  
天未能忘新事業  
帝方延佇舊勛庸  
謝家羣玉紛為

南齊志 卷四十九 九  
壽笑語王正恰首逢

何似靈光魯未傾，歸然元老贊昇平。  
致身如此心彌下，報國歸來力尙贏。  
日借趙衰春倍煖，霖求傳說早無驚。  
絳帷況復霑河潤，試出新歌和早鶯。

送溫長卿太史還朝

前人

寒溪水落時短棹，與君辭亦戀故園。  
色還深明主思山，晴句曲道冰合濁河涓。  
悵別寧因遠，銜情遂及私。艱危生事薄，潦倒俗人疑。  
有識能違眾，非才媿獨知。遙遙江嶼望，脈脈暮鴻隨。  
計到長安日，聞子閉戶期。

蘇文忠現夢呂益軒先生重新寺宇賦此志感

溫體仁

丹嶂從教力士開，赤山豈意亦成隈。  
滄桑難改三生願，魂夢仍爲護法媒。  
樹立空庭窺月下，雲橫古壑待龍回。  
千年慧日敷新象，應是坡翁此再來。

贈楚溟上人

前人

偶此寄浮踪，幽尋得遠公。  
心超濁世外，身隱白雲中。  
離垢原無淨，隨緣卽是空。  
知非吾已晚，斯意儻君同。

跛法師歌

釋祿宏

跛腳法師胡以名，良由能說不能行。  
我今行說兩俱拙，不應無實當斯稱。  
春王正月纔過十午間，隨例入浴室。  
失足俄沈百沸湯，不起牀敷五十日。  
瘡痍甫平，筋力疲左，長右短行，參差東行。  
夾輔二童子西行，交倚雙筇枝。  
是故此師名跛腳，跛去跛來人。

笑殺笑殺平生好放生善因惡果理難合頗有市肆旃陀羅割  
羊擊牛烹鳧鵝鼈鱉蟹蛤殺無數而反康豫無纖疴放生誠有  
長壽理因果無差休亂擬我昔殺業今須償身痛心生大歡喜  
傍人問我喜者何我以此腳成蹉跎趨奔無始至今日步步趁  
入無明窠或趨名兮據高位衝寒踏徧金階地或趨利兮走天  
涯歷盡燕秦並楚魏或趨勢豪候門牆不減立雪之游揚或趨  
女色越垣闥繇此暮夜遭傷亡或趨檀施求無已匍匐泥塗沒  
其趾或趨友朋時往來破夏踐殞諸蟲蟻或趨五嶽及三山南  
馳北驚芒屨穿所以如來苦呵責舉足動足皆冤愆幸哉今跛  
損成益思欲閒行行不得潛蹤斂跡守林巒多種狂心一朝息  
客來恕我不起延兀兀似入磨磚禪閉門無事且高枕欲學翠  
色煙嵐眠祇愁此腳不終疾趨奔萬境仍如昔願君不跛如跛  
人勝彼長年掩關客

聞非翁卜居潯上

董說

一事猜君野計疏樵船疊架載圖書應憐山水苕溪好得見移  
家畫裏如蟹舍朱顏楓葉醉松窗綠髮雪晴梳木蘭製楫絲編  
纜相望柴門鑿小渠

非翁擬遷潯上詩以促之

前人

苕溪古寓公詩筆例高秀先生冰雪文翠與晴峰鬪杯擎西塢  
茶花種秋籬豆余將覓漁路敲門問奇籀

黃九烟居士重過寶雲

前人

不朽文章感慨餘未成吳越卜新居北天簫鼓仙韶樂夢國河

山太史書自言將製北俱盧傳岳記清裁空左馬禹碑真訣授  
樵漁並隸九何年去挈東籬叟謂湘中陶仲調三笑重將旅抱舒

大風

顧雲

萬瓦輕於亂葉飛太虛磅礴無光輝空村豺虎夜深出山下獨  
行人未歸吳興藝文補目錄注寓滄

解蛻吟十首并序

黃周星

今歲在庚申予年已七十矣念世事之都非嘆年華之  
易盡與其苟活不如無生昔傅奕自銘曰傅奕者青山  
白雲人也以醉死余慕其風以爲醉死殊勝餓死但自  
銘則當曰詩人黃九烟之墓耳似茲含笑而入地何異  
厭世而上仙聊爲解蛻之狂吟以當獲麟之絕筆笑蒼

老人九煙氏草

苦海空過七十年文章節義總徒然今朝笑逐罡風去縱不飛  
昇也上天

人間枉自說科名讀到奇文鬼亦驚三十年來干斛淚誰知一  
事竟無成

文皇桂殿久臨軒構得吾家將就園好去崑崙山頂上大開天  
眼看中原

塵蒙錦繡最堪哀濁世何人識異才可惜詩文光萬丈一齊埋  
沒付蒿萊

傷心萬事劇紛紜不欲看來不欲聞收拾聰明歸去歇好隨冠  
珮拜彤雲

神鬼人兮並地天仙家五品豈虛傳但能脫卻紅塵去莫問神仙與鬼仙

幾年窮餓寄雞棲忍死謀生足慘懷薇蕨已枯歌未絕今朝眞箇是夷齊

久隨患難有糟糠一旦分飛黯自傷膝下依依惟弱女移家好傍碧衣郎

半生辛苦爲兒曹漫說超宗有鳳毛他日雙珠能照乘文章門第自然高

皇天后土心無愧萬古千秋氣不磨此去何須生怨恨江風山月自高歌

庚子紀年詩一百四十韻

前八

低頭問皇天仰面呼后土我生何不辰罹此百憂苦百憂果如何更僕難悉數約略請敷陳聲淚已盈楮憶昔居母腹爲日方百五勃谿遭椎擊危若髮一縷天幸不隕殪歷冬晨始舉暗昧畀周氏僵凍漏二鼓本是東吳人忽改爲南楚哀哉鮮民生生不識父母父母謂他人葛藟悲河澣所賴撫育慈恩亦均恃怙質羸幼善病藥餌填肺腑母也頗卞急擠牀或逢怒稍長就外傳頭角漸可觀羣小如鬼狐怙寵時侵侮憤懣遽吞藥乃竟無患苦十六試辟雍至冬喪厥母十七甫受室糟糠實貧窶寢苦仍析炊時復纏二豎十八補成均十九貢天府名始達九重其歲爲庚午藉甚早蜚聲困悴了無補瓠落歷窮冬無聊適湘浦四千里風波六十日檣櫓鷓枝且卑棲詎知非吾土亦越癸酉

冬逝將圖進取間關賦北征水陸備艱阻一驚隣舟盜再驚沈  
舟估戒心乃啟途驢背觸炎暑抱疴竣棘闈自分孫山伍忽爾  
厠賢書毋乃荷神祐甲戌竟下第經旬病羈旅涉冬仍返湘終  
歲門空杜倏忽丙子秋計偕仍赴部附舸出洞庭綠林逢乳虎  
橐裝飽饑喉雞肋支刀斧性命幸無傷萬卷葬洲渚丁丑再被  
放神氣倍慘沮南還卽劇病死生爭銖黍病起復移居奔走徧  
城墅無端入親舍雙親忽云覩時年二十七始知真父母咫尺  
暫相依脉脉未敢吐周氏尋覺之姬豎爭煽蠱周父頽泐餘信  
讒遂齎怒相尤非一端漂搖失故處避地過廣陵伶仃寄春廡  
庚辰復計偕名籍尙隸楚情人賚藩牒兼復持資斧誰知姬豎  
輩偵探盡掩取匍匐將抵都敢望筮鵠羽是年忽登第天意憐

沈苦廷對擬第二多士欣抃舞乃不蒙宸鑒依然置儕伍其時  
雖釋褐齏鹽仍逆旅中有周氏奴挾刃不利主幸爲同輩窺遣  
去害始杜籃輿冒暑歸役夫棄墟莽踰淮復大病歲杪纔臻楚  
周父俄捐館縗經過憂癩是時寇氛熾三楚半羆豸狂徒忽乘  
釁刑牲鳴金鼓避亂去長沙負困潯陽旅癸未乃移家艤舟湘  
之澣載米可千石忽爲亂兵阻兵去寇旋來破竹摧州府自春  
聿徂秋寇已逼門戶棄舟走豫章千石付一炬間道抵金陵登  
堂且將父母已闕黃泉風木恨何補甲申值南遷謁選補計部  
錢穀非所長聊復濫圭組未幾又鼎革蒼黃移鐘簾挂冠遂遜  
荒田廬棄如土崎嶇入霞關揮淚從牧圉戊秋復遘變狼狽創  
彌鉅奔竄嶺海間重繭百里許入水有鱷蠖上山有豺虎賊黃

巾紅巾兵赤羽白羽宛轉兵燹叢步步逢矰罟一厄古田岡再  
厄連江澈三厄海口村四厄瑯崎嶼五厄至南臺洪波夜衝宇  
蓬跣冒暑趨仍憩古田旅羣盜又大至喘汗走欲死六厄華山  
巔七厄西莊圍八厄朝漁兵九厄槐尾炬月黑走踉蹌日晡泣  
空釜店瘵動經年瘡痂不得瘳菜色類鵠形鶉結懸藍縷九死  
而一生子身鬼爲侶子秋出橫塘仍遭么麼侮流離達武林僥  
倖脫砧俎四海嘆無家舉目非吾與漂泊東南鄉賣文兼訓誥  
刺促十餘年摺摺偷些窳寄生沮洳場饘粥聊偃僂靈椿又見  
摧終天悲呖帖迄今庚子冬遽齡已屆五服政則無官招隱則  
無侶欲躬耕無田欲授徒無主上不能醫卜下不能農圃居不  
能陶漁行不能商賈念欲訪神仙何處寄妻女念欲歸苾莠無

兒懼殄祖忍死復謀生津梁疲吳楚空持三寸錐無濟二區脯  
眼看輕薄兒忍辱惟聾瞽同姓卽他人獨行嗟叟躄自憐幼服  
儒科第幸竊取名節勉砥礪矢志答君父俯仰無一愧聖賢或  
見許詎意丁百六蔗蓰成莽鹵傷心萬事非身世兩乖齧生平  
好讀書書散不得聚生平好著述錦囊空蠹腐生平好山水海  
岳多悵佇生平好花竹誰乞東山墅性嬾愛幽閒笠屨無安處  
腸熱輕施濟點金乏丹黍亦復喜開樽貧難得佳醕還復悅傾  
城奇緣慳玉杵屈指半生來鬱鬱渺歡緒風波十之三兵火十  
之五疾病十之七拂亂不勝數譬彼夢中蟲習苦竟忘苦譬彼  
冰中蠶生不識春煦譬彼萬斛舟逆流滯荒浦片帆未挂風摧  
篙頻折櫓宇宙非不寬容身少環堵知己一人無悠悠愴終古



南漳志 卷四十九  
磊落好丈夫不如嫗與姥上負生成恩下慙貧賤婦四十九年  
中年譜皆愁譜有眉不得揚有氣不得吐有願不得酬有懷不  
得抒人巧我獨愚人樂我獨苦生我意何爲厄我向誰語天地  
奈爾何長歌淚如雨

從月函上人乞竹

前人

一片秋聲午夢殘萬條綠玉傍人寒從君乞取綠何事欲向江  
頭把釣竿

立夏日同友人郊行卽事

前人

不將塵土負烟霞此日清和節果佳竹畔已登高士楊桑間還  
過美人家彌天新綠初聞鳥隨地嬌紅屢見花山水文章眞夙  
好更期同泛五湖槎

題侯庵易發

張雋

拂意聊揮杏葉圖天山巖嶭井泉枯偏師忽破無生國拍手靈  
巖唱鷓鴣

寄侯庵

前人

響屨廊間片語投歸來敝屣視菟裘要看末後全提句莫爲干  
峰抵死留

英雄灑水入潺湲歎息誰撐淡泊門眼底髑髏乾不盡晉人吹  
劍更重論

易稱遜尾洵奇哉善牧鞭從最後催書畫於人深有益累心無  
奈遣須開

破船傾底葬洪涯不遣龐家笑米家零落平生傳述事尙餘天

南溟志 卷四十九  
半粲朱霞

豐草庵邊絡緯鳴梅花渡口見秋鶯此間少許憑誰薦肯逐他家餽飯行  
不因廬阜拒泉明底裏狂歌尙詠荆何事溪橋傳一笑千年流水作悲聲

初得豐草十集

前人

十年夢讀鐵函書忽枉緘題爛五車指指伸眉方疾讀怕驚蝴蝶更蘧蘧

初體新題置十編馬蹄秋水似當年何人卻立梅花渡薦得聲前早外篇

送裘夏之靈巖定省用垂字

前人

漏永蓮花日正垂多君觸熱度山籬篋中忍覩思親句空外如傳命子詩零落故書猶可問斬新公案更須窺歸雲未捲南樓夢好借羅睺爲致辭

寓溇口號

前人

溇市十家九壓油夜半打車兼打牛吟枕忽驚時起坐殘紅乾盡更垂頭

舊吳角譜傳龍子三十年餘振此風枉爲象經開講說里兒不學已能工

作俑初將靈薈刊後來風雅出扶鸞書驅醫卜歸巫蠱烏篆蟲書列大官

一變爲緇再變黃自稱扶弱不扶強教成新錄琅玕立好爲休

文上赤章

何處妖姬唱采蓮市人相率費金錢不應司馬無情思長旁湘  
江估客船

虎吏排門被酒來紛然關節效參陪不知竟擇誰家肉又擁吳  
娘倒玉醅

鐵磨鳴鐘建法筵送來新髮髮齊肩化人旁午諸山至催納堂  
頭上壽錢

市厘尺地易千金不計傳來歲月深選選變更三四主猶爭譚  
謹與龜陰

自于香火有深緣舊管新收幾缺編旅食數年無可似最難忘  
是賣書船

閉門讀易林居士默坐觀仁沈尹同不識世間何似者一池荷

葉一菴松

自注西菴  
易姓林

冬日賃春皋橋芝筠先生見過

紀磊按皋橋在  
南柵即高基橋

閔南仲

廣廈初蒙庇仙舟更枉尋斜陽如挾橫流水似彈琴羸馬千金  
價孤鴻萬里音家鄉安處是不作越人吟

月函老師見懷次韻奉答

前人

半生龍劍蟄書巢敝帚猶存未忍拋一瓣空香依古佛兩間破  
屋集談交陶潛乞食詞偏拙闕澤備書手懶鈔畢竟此身何處  
着白蘋香淡釣秋郊

兩眉長鬥月痕尖碁局虧成玉半奩此日詩壇宗瘦島他年佛

火伴香嚴新銜客子仍磨鏡舊號先生本織簾若要負還不  
俗由來竹肉那能兼

鷓鴣溪冷夢潭孤  
略約年深已半枯  
秋雨自吟枯樹賦  
春風誰補落花圖  
詩心易得魚千里  
劍氣難消酒百壺  
親向晦堂聞密義  
木樨香裏覓萱蘇

潯上董復園使君治螺川有善政詩以紀其事

前人

嶺北湘東烽燧舉  
妖童少婦城頭土  
母求死子妻失夫  
千村萬落無寧宇  
已看豔玉委泥沙  
更見嬌紅墮風雨  
想魂尋夢春淒淒  
淒死別不如生別  
苦螺川通守天下  
稀哀厚遺黎同子  
女一聲威鳳鳴朝  
陽孤鴻寡鵠皆成  
雙右此離曲

油田山谿高崖巽一夫當關萬夫卻  
山岷鹵莽弄佳兵  
錫簫土鼓充饒錫  
秩宗後裔今王祥  
安車徐度忘邱壑  
春風雷轉鷹化鳩  
手握渠魁解其縛  
干井弓刀變耒鋤  
兩年逋賦歸扁鑰  
虐我則虎撫則人  
金雄好語懷郭文右油田謠

禾川荒畦多且久  
白日蒼茫照稂莠  
石田悉索供官糧  
秫米贏餘造私酒  
鴉飛欲墮蛇倒迴  
若箇官人能履畝  
董侯學道有英標  
靈雨薰風隨馬首  
畫圖析壤民吏驚  
判別宮商分卯酉  
田清稅足無照瘢  
口碑鬱律山川壽右履畝謠

井梧著雨秋如穀  
螢火晶晶夜深綠  
東鄰桃李少年兒  
化作衝衣白蝙蝠  
籀冠小兆夕陽西  
倚風三弄神絃曲  
使君恐誤百年人  
石作闌干護幽獨  
清於古鏡直於虹  
土花碧眩蟾蜍目  
青禽

何處忽飛來井上雙雙夏寒玉

右井  
榦解

壽董芝筠六秩

溫睿臨

四海喁喁擊壤歌卻令安石老山阿指揮曾答蒼生望高蹈終  
如隱癖何煮石茹芝堪笑傲藥欄花樹足婆娑聖朝若問經綸  
業願訪先生安樂窩

徐松之先生過訪

董樵

淺水輕燒剡曲船奚囊鶴髮意翛然挾持烟水詩人筆松老方  
刻百城  
烟水至壽搜訪遺跡來際風霜落雁天懷抱每從遊展展編摩先藉梵宮  
傳辟疆老去吟壇冷品藻端歸杖履前

夏永寶尊翁降乩記事

紀官

昔有遠方客抱病潯之涓深夜汲溪水水際逢仙姿修髯飄長

袖一丸忽贈貽服之卽慶快長跪詢所來云我寓洞庭王氏室  
相期似夢猶未釋依言往叩之堂懸呂祖像宛如與藥時又我  
五世祖假寐無所思夢入湖濱宅稠人乞賦詩相忘已匝月其  
人來致辭懷中出夢句撫掌共愕貽二事非浪傳今有合璧奇  
聞述玉崖子沒後猶濟施憑乩降南村點筆病者差感而請姓  
名五言聊自怡覽者知先生絮酒奠庭階嗣君雖卻謝時祭虔  
不衰始知天壤間止氣為撐持

裘莊丁母蔣貞媛歌

董友松

吁嗟乎烈婦易兮節婦難榮枯閱盡冰霜寒鵲唳深夜不敢泣  
一身長作霄淵看如茶飲血未亡人喻如纍石排驚濤慘澹經  
營生死間絕者使續危使安陰霾既埽白日淨拮据初就心枯

乾豈念同生不同死但恐一死之後宗祧反手成波瀾吁嗟乎  
烈婦易兮節婦難表莊貞母有文姬相夫未終影獨悲淹留薄  
命答天地寸絲欲繫懸崖摧吁嗟乎節婦之難難于生百罹孤  
鴻杳然去不返寒雲漠漠風淒其熊丸味苦能療飢織月聲哀  
能養軀負土辛勤學俞母蘋蘩勿替垂清規庭前林立盡孑然  
蘭英桂粟標孫枝秉心幸無負夫子冰心豈肯求人知不有採  
風紀彤管芬芳委置空山睡吁嗟乎節婦之難難于死而彌耀  
投機斷髮稱來茲

朱烈婦

前人

潯東朱氏子疾已篤矣取婦未半月歿于上巳日越七  
日婦遂自經于寒食之夕

飛花如雲白日暗燕澀鶯酸春冷淡冰心一片月三更夢斷殘  
燈鬼猶瞰澹旬不成連理枝風雨俄驚又一時吳絲蜀桐彈不  
徹從死黃泉作寒食

朱烈婦方氏哀辭

董師植

雲迷總帳月痕虛獨鵠含愁賦索居泉路從容尋舊夢香微燈  
淡影疏疏

明月篇

前人

閔子耐庵名南仲宮保曾泉公之孫儀部園客公之子  
也少有逸才不事家人生產舊業蕭然僦居潯上十年  
所矣性落拓復喜嬉遊人鮮矜式余愛其才作短歌以  
贈焉

明月皎如珠我心潔如璧珠璧燦朝霞光輝耀王國明月為君  
憐我亦為君悲伏櫪贈君明月珠月明照沙礫願君掃霧復犁  
雲手挽長河滌魂魄雙壁自連城璀璨同今昔邀我五湖遊浮  
家還汎宅弄月吟風吹鐵篴

誌異

紀端

馬遷合傳豈稱工潯水東南得二公不飯十年沈備老無眠終  
歲董江翁

挽萬里揚

釋秉融

萬里揚先生者寧國之高士也少習經史及長恬退酷  
嗜青囊好談元理氣宇溫和平胸無圭角名山大川無不  
遊覽因寓於潯晨夕往來淪茗清談瀟灑之風溢於眉

睫我庵建塔於邱城山擇日定穴深有賴焉不意今秋  
溘焉長逝余適在維揚不得面訣感念疇昔詩以悼之  
幸遇桐邱公之賢裔修益曹公親視其疾經理其喪旅  
櫬得歸終全交誼求之于今罕有其人亦莫非有宿緣  
在焉

一夜淒涼赴九泉小窗愁對月孤圓離魂徒設家中奠生面從  
教畫裏傳到處為人封馬鬣問誰代汝卜牛眠故交若上情難  
盡空向天涯焚紙錢

節烈篇為夏編修弁南妻姚孺人作

謝洲

生亦誰不貪乃獨捐棄之哀哉上林鳥相背成孤飛憶昔初入  
門蓬華相因依軋軋弄機杼琅琅誦文詞機聲與書聲往往至

鳴雞中間舉兩雛一女復一兒女能學鍼刺兒能竹馬嬉團圞  
在家樂雖貧亦不辭及君被鄉薦襍被出里屏求榮以養親豈  
怨生別離送之及中門不敢雙淚垂是年君下第馬首復南歸  
慷慨益勵志僧房長下帷家務戒勿聞省親乃一來計偕人北  
上從此相見稀天街縱闊步羣仙接階梯編檢供史職敢作家  
室思永爲燕雲客夢或來茗溪妾時居深閨夫子豈不懷官清  
家益貧安得輿馬資惟恃兩弱雛煢煢歷歲時奈何生不辰一  
子中道摧椎胸更呼天血淚日夜滋久因得瘵疾長愁身亦羸  
幸賴存此女視如瓊樹枝君時數寄書迫促詣京師妾念病未  
痊可使君無嗣辛勤覓側室比行挾與偕遲遲至仲夏毒暑蒸  
路歧我女最孱弱不耐車馬馳中途抱危疾幾不及王畿見爺

纔一面卽日歸黃泥妾固痛欲絕君亦失聲啼並無聚首歡但  
有生死悲妾乃復大病君爲日護持參苓頗艱難終日顰雙眉  
妾愈君疾作沈沈屢瀕危自夏復逾秋呻吟臥重幃藥石總勿  
效一旦隔夜臺夫乃婦之天夫死婦當隨世或有不然是糟  
糠妻斬然僅一身偷生欲何爲決意遂投繯君先妾來追忽爲  
左右覺喚我孤魂回又言扶櫬難非汝將付誰斯言亦有理強  
留固所宜遙遙出國門歷歷踰青齊眼見來時路觸處增涕洟  
江南又在望不日返舊居妾形雖故吾妾命已如絲又念是命  
婦亦當知禮儀維揚買朝衣姑蘇買冠帔舟中密密縫朝夕自  
提攜須臾抵故鄉上拜翁顏慈大事妾已了致命夫何疑闔扉  
復自經決絕無徘徊謝子居比鄰聞之爲歔歔憶與太史交羨



其志崔嵬將崇忽又圯不覺心悲哀今亦可已矣有婦賢如斯  
表揚先草野因作輓歌詩誦之向當路庶幾聞丹墀旌命一朝  
下可以激衰頹莫言非中道偉節不可譏

題高祖王父光祿公手書第二疏草後

董 燧

故明神廟無適子恭妃所產宜君王何來鄭妃恣房宴有子亢  
寵干乾綱大高殿中誓語密金書玉盒先襲藏時呼都人忤慈  
聖每云待適欺廟堂皇后冷落恭妃遠廷臣憤懣言難昌是時  
高祖職中儀特發大難排天閻世子齒學古有禮豫教斯耀前  
星芒飛章丹地未省視復救廷杖詞煇煇陛下孤立誠切直宰  
相顛倒彌激昂已分骸骨化碧血偶蒙削籍南還鄉後來國本  
久乃定猶爭挺擊殘忠良何況龍萊孽方熾隻手砥柱狂瀾狂

國變事餘二百載史臣誦略頗不詳兩番諫草幸存一白簡字  
字凝青霜

談烈婦歌

張鴻憲

停我杯擊我缶慨當以慷兮歌我談烈婦烈婦只知死從夫慰  
姑舅豈知清風勵俗揄揚學士文人口親白頭孤黃髮百年教  
養宜磨折無子女有叔伯吞金斷頸不嫌形毀而性滅送夫君  
安窀穸三尺紅羅接素帛徘徊北面端挂靈幡側生則同衾死  
同穴婦從夫死後先未及四十日又聞蓋棺時生氣猶奕奕內  
縞衣兮外衰絰層層帶鈕數百結唬痕淚漬斑斑血嗚呼烈婦  
得其死慰死慰生兩全耳鬚眉不見立綱常大義奇行敦女子  
談烈婦千秋萬載此姓氏水不能浸火不燬我歌不可長我歎

不復已聊寫一言代哀誄佈告明廷彤管史

田烈女

董承勳

日色慘澹天晝暝瑟瑟帷風鬼瞰影杜鵑血淚染絲綸霜花泣  
月芙蓉冷良人未識嬌鸞孤柔腸百鍊堅不磨珠襦玉匣棄勿  
用從容一死隨泉途貞心炯炯乃如許竚看綽楔褒天語千載  
芳名重鼎呂董家婦田家女

松柏詞為貞烈田甥作

紀復亨

明月耿青松飛來孤鶴語宛轉有餘哀下有田氏女解一五歲誦  
詩書十歲織流黃十三佐中饋及笄許董郎解二董郎不知處似  
說遊袁浦隱隱母歎息兄弟私堂廡解三堂上何區區郎死不復  
疑母弗防阿女女轉防母知解四含笑語阿母東家數接取叶奈

何阻嫵情與母整簪髻解五母去帷房空女死始從容重重束縞

素物物自緘封解六牀頭朱絲繩畢命手所緒孤燈青熒熒芳魂

向何處解七母歸枕尸哭舉體梅檀香兩家請合葬松柏鬱相望解八

解八

題訪書圖 有序

楊鳳苞

劉三桐少好聚書楚游歸後搜羅益富積至數萬卷築  
眠琴山館貯之猶以為未備嘗屬杭人奚岡繪訪書圖  
以見志惜不中壽奄忽即世嗣子瑛幼弱其書皆為市  
人竄取以去可嘆也君從子煥寶弄是卷出示索題傷  
逝者之不作慨遺書之悉亡頽唐老筆言之不文聊以  
紀實而已嘉慶十五年涂月

尚贖奚生畫香厨久棄捐傷心餘簿錄過眼付雲煙壓架猶如  
昨充箱孰與遷藉君珍此卷想像舊瑤編

自古圖書厄多經劫火亡未聞豪賈啟舉作債家償編校留希  
弁飄零憶蓼塘披尋一振觸老淚忽淋浪

雜詩

施國祜

出門火伴慣經營賣假由來少賣誠石暈犀通妍易取蠟言樞

貌售偏成斷須不二名時價勿使相干變物情往記南漳區辦

好金釵札語最分明江村消夏錄趙文敏八札第一與直夫姨丈札畧云金釵一雙重二兩望姨丈親自

看視那換打造發去其餘有可于南漳辦者望用情區處南漳不必辦者已屬師舅往平江辦矣

漢傳文頭幕馬蹄宇周原不禁河西齋輕錢貫無方孔估定銀

流有額題案此錢俗稱洋錢亦云番餅出于和蘭佛蘭西干絲臘俄羅斯諸國載至閩粵洋船其文有馬劍雙燭花

籃等名而以人面為恒貨卅餘年來通貿中國每船率鉅萬數其銀色中等平圓徑寸餘無孔厚約分許秤重曹碼七錢三分五釐沿邊皆有番書數目字內地銀牙與各省銀貨及通寶合值流行較之銀貨無水色高下分兩輕重之辨比之銅錢無盤數多少舟車搬運之勞近來商賈蠻貨居然權管權童眸率爾無不以此錢權百貨皆私便之

誌異

紀 岐

仁人視弟兄素云肉與骨末俗視弟兄何殊吳與越不思生生  
初氣義本一脈嗟哉我弱弟孝友性所發生前多自奇死後更  
咄咄我遭二豎崇一病五閱月服藥病轉深奄奄息如髮三更  
不成寐孤燈明復滅我弟飄然來欲語先嗚咽為言親年高不  
堪再顧蹶弟寧不自思兄何不自惜勿藥當有喜此義見周易

若再誤庸醫空作溝中瘠悽悽聽斯言恍忽記一一尋思頗奇  
異強謝參與尤氣體竟以舒轉轉心安適旋復半月餘身健如  
恒日感為治牲酒再拜臨其穴弟言猶在耳弟容不可即反不  
若病中庶可依魂魄含淚誌數行弗使等虛擲南枝謹案乾隆庚戌先君年二十二時季父沒已三年矣季父至行不勝書而此事更奇異也季父諱方虎字炳章喜繪事又善吟詠卒時年僅十八

水巡船

夏蔭棠

一聲呵喝來縣官捉船何為哉捉船言將赴水巡吏胥歡喜船  
夫哀船夫船夫爾莫哀輸金乃免當官差日日輸金苦不足供  
伊買笑倡樓宿不管估船夜獨行蘆荻蕭蕭風肅肅

婦某氏憎其夫將鳩之夫覺食有異持鳴官官離棄其婦

原婦罪

金錫桂

長官新到禁浮薄半夜張燈捉賭博羣胥洗手謝陋規一錢不  
入私囊橐有愚者氓娶美妻凝妝婉變空閨啼雄飛繞樹求野  
匹雉鳴得牡憎家雞開筵召夫置精膳腐腸藥物盈中見夫驚  
持盜鳴諸官傾市願看包鐵面官不坐衙西日斜市人漸散心  
咨嗟明朝但聞女已嫁故夫獨自歸其家尹翁歸趙廣漢神明  
各噪扶風傳官縱別有鉤距法奈何不下一筆判市人不識長  
官意影事訛傳竊竊議妻毒夫死妻不治賭具何妨重準備

明史雜詠

前人

烏程士氣靡于草累葉清芬愧世臣猶有郎官應列宿蓬麻植  
立敢批鱗禮部員外郎董嗣成

曝書亭子誦先芬國本危疑屢疏陳拂袖同官歸去早幸題此

老亦邪人太子少傅武英殿大學士贈太傅諡文恪朱國祚文淵閣大學士加少傅贈太傅諡文肅朱國禎案國祚非溥人

釋褐之官運已傾全家婦女亦英英絕吭引脰尋常事一洗烏

程辱國聲徽州推官本朝賜諡忠烈溫公瑣

紀孝子宿墓圖詩

董蠡舟

嗚呼萍翳何不仁昭陽歲皋月淫雨將二旬田廬漂溺塚破屍  
沈淪紀君之親墓高地非水衝浸淫已沒馬鬣封先人體魄委  
之洪流中將毋暴骨中原同人子何地可自容爰棹扁舟居墓  
側量水增減晨昏測朝量一寸增孤兒淚一升暮量減一尺不  
啻百朋錫日日持竿測不已何時得見墓出水墓出水修復完  
兒雖溘死心得安孟秋既肫日加午雷電以風復大雨絕維折

舵力莫施舟如一葉從掀舞隨風播蕩數十里已分湛身蛟室  
底願緩須臾且無死孤兒得見墓出水稽首籲天天有耳一語  
未終絀木止自夏徂秋七十日若斧若堂看盡出墓出水修復  
完歸未浹日天遽下玉棺孝子身死心已安英英諸郎君志行  
芳且潔丹青圖寫揚先烈已見旌門標綽楔孝子之名垂萬春  
此詩此畫示後人人人不忍死厥親嗚呼萍翳何其仁

捉船行

董恂

年年三月春水生漕艘打鼓飛帆行今年阻淺行不得篙師縮  
手真無策縣吏今朝盡下鄉有例捉船云載糧捉船載糧船數  
足捉船索錢難滿欲朝廷正供官長符那知徒飽奸胥橐大船  
有錢可潛避小船無錢復誰替捉船計已出權宜誰料捉船還

有弊嗚呼載糧捉船尚如此催糧捉人更何似

題董若雨先生孤舟遺照

邢典

無方得礙有家浮想見當年孰與傳歲隔湘人依水市暫逢煙  
客過山邱夢華潭冷心中事豐草菴荒物外秋著述等身名滿  
世蕭蕭蘆葦一扁舟

晚青大兄屬寫小梅花庵圖因題二絕

吳巖

怪道清癯不入時先生高格畏人知舍南舍北梅花發淺酌椰  
瓢自詠詩

屋後青螺聳翠鬢菰蘆深處轉溪灣庵前亦有梅花放應被人  
稱大小山

題紀孝子峻宿墓圖

許旦復

黑蜨災何酷漫天巨浸稽荒陞迷石券遺兆認碑題依戀趨庭  
切追陪孤艇栖夜深風浪起驚絕夢中啼

潯溪雜詠

方燾

豐草逃禪非佞佛芝筠攝靜不談玄可堪藝苑風流外也共青  
棠吹景傳

南渡狀元稱地主前朝十俊半三台近如吳范皆蘇產紀老商  
邱發解來

相國鼓祠淪蔓草空王薦福祇寒烟斬新共指文星閣涓滴誰  
尋一綫泉

百尺紅樓四面窗輝煌紺宇界吳江一從宗伯題分水來往飛  
舸對影雙

秋水纔添沒釣磯荆吳漾口荻花飛市頭蟹胥攜筐賣爭勝披  
繇黃雀肥

讀榴龕隨筆感賦

紀磊

一卷榴龕逸事搜毫端小試亦千秋貫高無救張敖死常使英  
雄淚暗流廷鉞力白朱恂寃雖無救于死人咸壯之

商父癸卣歌為温鐵華日鑑作

蔣鏗

温君好古歐趙徒廣儲金石供清娛酒酣示我商代物寶氣直  
上冲雲衢口小底大有環紐上下饗饗文迴殊神靈呵護數千  
載至今刻畫非模糊商家尙質不稱氏且字冠名名曰癸曰作  
父癸尊彝爵所鐫之字止此矣不陳功德不紀年以實清酌陪  
嘉籩自從牧野倒戈後一經兵燹遂棄捐仲尼搜羅惜未獲欲

觀殷道惟坤乾不然以器許子貢豈惟六瑚光几筵君今何從  
得此卣年年滿貯延齡酒每逢秋月春花時手酌松醪樂賓友  
更有鼎出承安宮西漢吉金堪作偶古來寶物藉人傳祝君期  
頤享上壽

壺山修南溟鎮志成用前韻志喜

汪曰楨

人情風土隨處異關西出將關東相小邑亦復具文獻豈徒土  
物誇佳釀好將史筆倩董狐自無挂漏招譏謗農桑知是民所  
重器具備登若簿帳著書未可有苦窳信如陶人製益益他時  
鐫刻付棗梨一編定見新書餉

題精廬小集圖六十四韻有序

前人

圖藏沈柳橋登瀛處張秋水先生鑑所繪記妙境庵祭

鄉先輩事也柳橋撰南潯備志南潯藝文補南潯著述  
總錄及南林鄉先輩私祀錄等書中年遽卒未竟其緒  
亡友丁子香桂爲柳橋外甥嘗以是圖索題余爲家蠱  
所困不復吟詠諾久未踐頃因纂修鎮志檢柳橋遺書  
復展是圖乃補系以詩蓋距柳橋之歿已十七年子香  
之歿亦十三年矣

湖州府七縣倚郭首烏程縣東七十里鎮以南潯名淳祐立鎮  
來六百有餘齡民物頗殷阜接踵多賢英文獻久放失約略猶  
可徵或生長于斯或蹤跡所經其人三十六季宋逮皇清有以  
氣節著有以文藝鳴窮者爲隱逸達者爲公卿要皆三不朽無  
媿鄉先生歿可祀于社古昔垂儀型柳橋沈子曰是宜奉椒蘅

瞽宗未及配私祀禮亦應爰議定軌則共約同志朋祀事歲一  
舉舉必於春正鎮西古蘭若始自宋代營云有朱進士創以守  
先塋本名厚德庵妙境後所更青陽好風日花竹麗軒楹僧房  
遠塵坐靈爽或式憑虔恭設俎豆稽拜薦芳馨品物雖不腆所  
貴將以誠羹牆慕先哲古誼夙心盟曠世意相感何啻雲龍并  
祭畢肅而退飲福集家庭鄉鄰莫如齒君子無所爭儀文相揖  
讓詩篇互酬賡如聞號呶戒必有監史懲砥礪交致勸談讌各  
適情張丈推祭酒作繪擘溪藤點染僅寫意六法師關荆呼之  
如欲出肖神兼肖形柳橋諳掌故攷索最專精著述證存佚記  
載別涓涇備志藝文補一一仿吳興匹諸玉枕帖縮本摹蘭亭  
別編私祀錄一冊付鈔謄誣詞辨譜牒軼事搜碑銘人各爲小



傳下筆心先傾進退寓微旨嚮往託拳膺知人論其世想見其生平與祭者名氏羅列咸詳明其名曰私祀其實乃公評此舉系風化矩範式里閭用以誌勝集永永期相承惜哉九載後祭遂輟不行頃余輯志乘簡要苦未能努力事編剗巨粒嗤蟻孽幸茲先路導體例堪因仍姑作川學海遑詡藍謝青常慨風俗敝思古寸念縈前塵渺難溯悵望徒盱衡何當更舉廢後賢以次增庶幾滅復續弗替如傳燈憶昔壬寅歲柳橋返化城遺物勤檢點似舅有佳甥攜此索我題歷久卒未膺詎知丙午冬甥亦歸沈冥流光驚掣電良友嗟晨星此諾不可負此詩今始成詩成重展卷感舊涕淚零時咸豐戊午孟夏月在丁十九日甲子晡後時加庚濡毫綴卷尾烏程汪曰楨

題朱文肅公家書冊

前人

先民自古曰在昔平涵居士有遺墨綸扉元老眞柱石惜哉早告歸鄉國權璫曾以邪人斥轉令青史褒清直均田一議名藉藉閭里歡呼省徭役當其委蛇方退食貽書訓子垂軌則庭誥傳家後人式二百餘年珍手澤一自萑苻烽火逼雲烟過眼徒追憶賴有賢裔勤物色如璜繁弱失復得錦暉裝池重拂拭眸容彷彿如可覲兵戈劫餘留此冊墨采猶騰光艷赫清門世世食舊德子孫永保期無極

漢承安宮鼎歌溫鐵花索賦

張鑑

鼎口刻承安宮銅鼎容一升重十四斤甘露二年安丞長福掾祿守令史宣夕世造第五三十一字

羨君好古世無匹商卣周鐘列甲乙鼎復傳自甘露年斤重十  
 四升容一一腹彭亨石鈹圓兩耳連卷象簡植活翠橫分帶露  
 茄生沙肯假負霜橘口鑿小字卅有奇隸楷分明郭香識承安  
 之名宮史疏黃圖不收禁扁佚維時宣帝起下杜天子氣從獄  
 邸出蓮勺鹵中困魚服仇不能即鼎有實丞既曰福掾曰祿令  
 史曰宣例取吉拜名青瑣號夕郎造此者世世不泐漢百官表注入對青瑣門拜名曰夕郎昭陽宮中故劍亡金馬碧雞祀奚及今年冬  
 夕字正是官號  
 向屬玉來明年春自甘泉入池陽蕢陽皆離宮便問張華等蠡  
史載甘露二年十二月上幸蕢陽宮屬玉館三年正月上自測甘泉宿池陽宮注池陽縣有離宮焉則蕢陽亦當不異鑑舊見承樂大典所載漢南北兩宮圖無承安名則三者皆當屬離宮無疑改元神爵又黃龍九鼎重  
 光萬牛力儒生稽古渺前聞濁酒不澆此胸臆拾香草堂花竹

繁佳友時來不速集語妙環生饜饕貪腹儉枵羞簞簞飭憶昔

校書誠本堂畫肚鉗脣費文墨今日重看一猛省過眼風燈那

堪述此鼎銘載積古齋鐘鼎款識中記舊與同年焦理堂朱某堂所夕一處賞奇析疑問以謔語然竟不識夕字之為夕郎詩成且告楊南仲與劉菴陳抱之更為精擘窮綆繡

漢十二辰鑑歌為温甥鐵花作

孫燮

吾考宣和博古圖十二辰鑑漢首列此鑑徑八寸有奇形質團  
 欒無損裂丙辰十二字不完外銘卅六亦半缺依稀辭義祝遐  
 齡幾欲讀之箱在舌雖無卯金年號存古器迴與後代別漢家  
 內寵多嬋娟對鏡簪花花態活昭陽殿裏嬌春風長信宮中冷  
 夜月此時此鏡定何依如寵憂讒兩愁絕今人不識古時顏古  
 器偏教今眼閱照殘興廢幾千年可惜頑銅不能說温甥好古

鑒賞精結廬地更樂幽潔周鐘商卣羅滿堂尤愛此銅手頻挈  
 我來正值梅花開坐向花前飲綠雪偶然論古及西京清談玉  
 有霏霏屑談餘出鏡互摩挲塵封未得鑿鬚髮吾聞古鏡光最  
 奇背影能向日中徹拭以珠粉塗以膏會使清輝爛爛發一輪  
 寒月掛壁間假歸照我肝腸熱

未門表兄有琴名秋泉崇寧癸未馬希賢斲掌殘距脫而  
 龍唇缺矣端溪硯葉石林所銘損一角古鼎亡其蓋漁人  
 得自太湖藝瓶底有漏痕爲吳中收骨董者所棄顏其齋  
 曰四不具有詩索和

前人

古琴缺其唇厥名曰秋泉朱絃久絕響掛壁珠絲纏龍池瞪目  
 視中有細字鐫崇寧歲癸未斲者馬希賢是時京卞用朝政初

改絃方士鑄九鼎議樂託神仙力闢累黍謬意欲掩從前取帝  
 三寸指以爲律呂權其說甚怪誕天子深信焉茲琴于此時制  
 作非偶然得無大晟樂遺器相流傳吾聞聲音道上與國政連  
 衰世民哀怨亮無和聲宣請君慎勿鼓當作古鑑懸

右缺唇琴

毛穎禿有時褚生等敝箒磨盡千古人獨讓陶泓久片石出端  
 溪巧斲雲根厚知是北宋物石林銘其右數語樸而奇端楷畫  
 不苟想當建炎初戎馬困奔走此研攜自隨玩弄不去手何年  
 墮一角剗處墨不受造物忌廉隅毀方成老壽不壞非形全請  
 問支離叟

右三  
角研

周鼎沒泗水秦政不能取汾陰有寶鼎得之自漢武鼎者火之  
 器千年藏水府茲鼎不知代出自太湖滸漁者舉網驚獲此三

足無惜哉遺其蓋如友判不聚難為龍劍合徒作破鏡剖吾聞  
鼎之用薦食等簋簠雖無玉鉉存尚有黃耳豎可以養聖賢可  
以享先祖視彼無當厄此器不猶愈萬事忌求全得半君無補

右無蓋鼎

葵瓶形如瓜色作病葉黃配以檀木几位置橫幅旁昔有故家  
子持此易斗糧越宿忽來返為其底有傷豈知入君室珍比球  
琳琅取水自挹注揩拭生晶光無奈水易竭插花不長請以  
挈瓶智借作養生方畎澮洩尾閭朱顏成老蒼不見蟻漏說東  
坡記書堂身漏甚不可瓶漏夫何妨

右漏底瓶

編鐘歌為未門表兄作

前人

八音之作首重金大者為鐘小者鑄磬師所教有編鐘笙鐘頌

鐘其名各半懸為堵肆則全鄭氏解云數十六或云十二與十  
九聚訟紛紜究誰確周鼎淪亡古尺廢千載茫茫徇龔俗後人  
掘土見遺器往往摩挲看不足此器制小重百兩厚唇鼻口侈  
其腹旋蟲錯落篆帶全形模識是編鐘屬想當明堂大合奏有  
司齋戒宮懸宿北陳編磬南編鐘下與笙鏞相間錯鳳凰來儀  
神鬼降萬國衣冠氣肅穆豎儒不識三代器瞥遇精光但貽愕  
故家收藏歷有年傳聞墜地出西蜀岷峨自昔隔中土古樂何  
由到此作自是好事相舉致愛弄不啻球與玉陵遷谷變隨入  
土鬼物護持在山曲夜深望氣不敢近光燄直向斗牛燭山靈  
獻寶寶出世完璧依然無損剝長鑱挖泥帚剔薛土花洗出斑  
斑綠人得人失幾代謝君適遇之樂復樂願君寶此慎勿瀆中

有蟠龍向人攫鏡銅劍鐵古有神何況金聲奏大樂國朝作樂告成功鐘律微茫講宜熟縱黍橫黍誰是非或但積黍貯以竹短長律管吹不齊至音何由辨清濁執將古器定高下勝使伶倫伐嶰谷此鐘登用會有時不見黃鐘待牛鐸

題張少蘭人海操舟圖

徐延祺

先帝丙辰歲橐筆長安遊前後兩出塞一登澄海樓雄關高扼山海陬兩京蔽障稱神州上有延袤萬里之長城下視齊州九點煙痕浮自藏萬人海壯觀茲為尤今年夏六月談笑來瀛洲西域賈胡皆碧眼長年三老皆黃頭歷涉重洋抵平地高桅劃天風浪收火輪發機捷於郵綠水黑水二水皆洋名瞥眼過十日快達申江流張生英妙誰與儔七年重見爭揩眸夜牀抵足話朋

舊或折其臂或搯其喉或陷於賊庭欲還道靡由生存猶之死何況歸山邱我聞此語心煩憂飽更喪亂驚惡浪回視身世成浮漚示我人海操舟圖或恐沈溺貽神差生平請勿語聽我歌且謳我今搖蕩將沈舟浮家泛宅亦不得男神女吟無時休逆流勇進固其理半由天命非人謀安得卸帆乘下澤與爾同為馬少游仙源一住三千秋

中元日常大道性黃三均偕顧旅齋相邀渡漢陽訪鐘樓下寺僧蒔花種竹處晚步郭公隄上榻坐茶寮復呼舟沿洄梅子山麓登卉木林即古上乘寺也喬木參天月華滿地山僧煮茗供客相與縱談移時泛月而歸二君作圖余賦詩四章以記

范 錯

際秋暑漸微涼颺動階樹良朋清興同款扉敘歡晤嵐影展遐  
矚荷香引幽步眷彼漢陰山問此夕陽渡脩楊覆陰濃新蟬咽  
聲屢靄靄原隰煙霏水汀霧疎鐘出蘭若茅屋愜情素壚圃  
一何曠秀英適成趣偃坐忽移時俯仰覺神悟苟無外物牽自  
有賞心遇

郭公著政績遂以名其隄數里亘如虹坦坦並馬嘶溇澗夾明  
鏡演漾無端倪石梁中高跨柳影分東西葛衣襲風涼茶寮復  
相稽籬花燦秋色晚鴉歸巢棲炊煙出叢薄皓月升前谿遠峯  
露青翠返照絢晴靄探幽呼小舸一碧湖光齊

泛泛舟輕颺沿洄山之隩鼓柁鳴岩阿臨流劃文縠山氣噓成  
雲雲容變攢簇輕霞掩暎間五色迷其目時或現金碧時或皴  
紺綠隱約亭與臺頃刻花間木圖畫天然開粉本少繁複兩君  
工六法討論互往復余側聞緒言快若夜深讀渚漚拍拍飛脩  
然絕煩煥

舍舟陟山寺岸陰煙冥濛秋卉雜紛霏忻忻雨露功古木閱人  
代鬱盤摩蒼穹絡以凌霄花遠訝霜葉紅荒榛竄野鼠隕垣吟  
暗蛩老僧述興廢試茗語從容山深梵磬清星曜河漢中月華  
靄緜闕朗鑒心神融維日初解夏佛事孟蘭供光搖石龕鐙響  
颺檐鐸風歸權擊空明水雲散不封丹青擅能手茲遊千載逢

南溟志卷四十九終

南海志卷五十九  
 志餘一  
 吳騫尖陽隨筆漢西嶽華山碑郭香察書察書二字辨者紛紛  
 明南溟董遐周云道安法師撰摩訶鉢若波羅密經抄序云阿  
 難出經去佛未久尊者大迦葉令五百六通迭察迭書以證察  
 書之說  
 李昉太平廣記引幽明錄晉建武中剡縣馮法作賈夕宿荻塘  
 見一女子著縷服白皙形狀短小求寄載明旦船欲發云暫上  
 取行資既去法失絹一匹女抱二束芻實船中如此十上失十  
 絹法疑非人乃縛兩足女云君絹在前草中化形作大白鷺烹

南海志卷五十

里人周慶雲纂

志餘一

吳騫尖陽隨筆漢西嶽華山碑郭香察書察書二字辨者紛紛  
 明南溟董遐周云道安法師撰摩訶鉢若波羅密經抄序云阿  
 難出經去佛未久尊者大迦葉令五百六通迭察迭書以證察  
 書之說  
 李昉太平廣記引幽明錄晉建武中剡縣馮法作賈夕宿荻塘  
 見一女子著縷服白皙形狀短小求寄載明旦船欲發云暫上  
 取行資既去法失絹一匹女抱二束芻實船中如此十上失十  
 絹法疑非人乃縛兩足女云君絹在前草中化形作大白鷺烹

食之肉不甚美

鄭元慶湖錄潘之藻云吳彩鸞所書唐韻真跡予曾見之南溟董氏其時董生洲司鐸紹之上虞予訪之暇時出以示予其裝潢甚精緻如今之手卷式展卷則逐頁兩面皆正殆所謂旋風葉者是也自始至末如小冊頁合而成卷裱法亦非凡手其所收韻較多他本頗有奇古字書法酷似鍾繇骨肉勻稱筆筆欲仙墨跡如新真希世奇寶也卷首尾有宋徽宗玉璽泥金書題句并各名人題跋

董斯張吹景集余購得一鏡縱橫俱三寸餘色消黑如漆鈕亦不甚闊背作忘憂花葉四旁古錦文中有銘三十二字銘曰煉形神冶瑩質良工如珠出匣似月停空當眉寫翠對臉傅紅綺窗繡幌俱含影中形神兩字半爲土蝕結字極奇古韞藉微帶八分對字臉字創體尤詭語亦娟娟深秀的爲徐庾手筆非唐諸家所逮魏晉碑板灰冷煙飛寒山片石空聞其語卽今六代風流不盡如王謝堂前燕者賴此一照子猶可想像百分一耳○此銘載蜀藝文志傳爲孟蜀時物恐未爾字畫絕不類唐以後習氣那可以耳爲眼耶弇州云似隋煬帝語此老故具眼然王先生猶未見字畫也考博古圖以爲唐瑩質鑑圖中載二器其一較余所藏銘多八字亦有小異末云光含晉殿影照秦宮鐫書玉篆鏤影清銅晉殿清銅語殊可笑其一銘亦三十二字但末句云綺窗繡幌俱照秦宮視俱含影中語霄壤矣余所藏確爲六朝物宣和二器當是唐人依倣六朝爲之者

學齋佔俾載遜跡山



郭家崖石臺鏡銘與此正合且云取鏡有風雨聲其神異抑寓言耶○閔子京曰張君房麗情集蜀王宗衍幸鳳州天雄軍節度使王承休妻嚴氏有美色衍愛幸之賜以妝鏡其銘云云遐周所藏鏡銘亦爾豈嚴媛奩中物因蜀亡兵燹塵埋郭家崖幾八十年至景德中始呈皓影今遂歸董郎玉臺耶芳魂在鏡當呼之爲董郎捧硯

張鑑蜀石經毛詩殘本跋蜀石經毛詩殘本自鵲巢首章之子于歸百兩御之起至邶風二子乘舟章止癸亥冬余還湖州見於王雪浦處未及假閱旣而雪浦寄吳門裝潢爲友人持去以影摹本還之雪浦乃以影摹本見寄昔人謂蜀石經毛詩爲廣政七年將仕郎試祕書省校書郎張紹文書而蜀相毋昭裔取唐太和本是正者則其與今本多不同無足爲怪聞錢唐趙氏

小山堂舊有蜀石經毛詩自周南至衛風疑卽此冊而又佚其半如後漢書竇融傳注引谷風作不以我爲德反以我爲讎與此略同則其實貴宜如何乎甲子立冬日

范錯攬蒞山房漫記王雪浦曩從書賈購叢殘碑帖中有蜀石經召南邶風二卷召南闕敘文及鵲巢首章注尙存半邶風完好字法整勁墨色古潤爲希世物余按樊榭厲氏詩云孟蜀石經僅一卷張紹文筆嚴形模周南疑誤辨輜字月令注釋亡哥奴似厲氏所見乃周南一卷今又不知流轉何許嗣雪浦家中落不得已歸之吳門黃氏茲道光六年石經精舍摹刊者卽是本也

陶鑄題華嚴經後右宋板華嚴經幾卷遐周居士得之以授沈

彥老彥老又屬之某師旁求全經不可得神物未合而延津之劍已挂遐周墓上矣某師因卓錫潯溪求吳文學書完全部以竟遐周之志遐周已生兜率而某師僧臘七十受持此經以老于潯溪兩人在華藏中當云把臂香林並蒂蓮胎者乎

殷赤珠跋宋本華嚴經歲庚辰及門閔子右端讀書法華庵中夏六月予以齋樓面西爲烈日所逼亦往避焉至則竹風荷露幽韻撩人鳥語蟬吟清音悅耳蓋不啻出洪爐而來淨土矣又嘗與範伊音大師揮扇談禪一日者範公出其所藏宋本華嚴經示余蓋大中祥符五年五月流傳至今者也乃閱未數葉範公遽曰君其爲我綴數語于其後隨取最後一卷置余前展而玩之則皆里中名人跋語也而先大父亦與焉時年八旬有六

迄今恰閱十載嗚呼遺文尙存音容何在展誦之餘曷勝愴惻謹謝大師不復能吐一語矣

朱國禎湧幢小品余鎮中有御書閣相傳爲宋高宗南渡過此留徽宗畫鷹一幅而去又趙松雪有滾馬圖一卷僧世守之袁胥臺成我湖宿其處題曰御書閣下鷹還在名義庵中馬尙存名義一曰法華卽御書所創處也今庵閣如故而二物失之已久且胥臺見時是嘉靖初年事失去是六十年前事蓋小沙彌竊出歸董氏質庫中僅得銀二兩事覺僧往贖不可得訴于大宗伯潯陽公公厚贈留之然非所甚好爲蒼頭持去不知歸何處乃孫青芝嗣部問于祖不應細訪求絕無踪跡蓋妙畫通靈必鬼神所寶化去久矣

洪邁夷堅志湖州烏程縣潯溪村民徐三者紹興十五年七月  
中暴死四日而蘇言追至冥府主者據案阜吏滿前引問平生  
既畢授以鐵篦使爲獄卒立殿下凡呼他囚姓名卽與同列驅  
而進吏前數其過惡令持箠笞擊應手爲血以水噴之乃復爲  
人如是者非一良久事稍閒縱步廡下過一室榜曰判官院陳  
列幃帳几格細視其人蓋故主翁王蘊監稅也詢所以來備言  
始末且力乞歸蘊許諾與俱過他府令坐門外須臾出呼曰汝  
未當來此今可復生手書牒見付使亟還且曰我在此極不惡  
但乏錢及紙筆爲用汝歸語吾家速焚錢百萬紙二百張筆二  
十枝寄我陽間焚錢不謹多碎亂此中無人能串治當用時殊  
費力宜以帕子包而焚之勿忘也又取首掠繫左臂曰恐吾家

人不汝信此吾終時物可持以爲驗卽泣謝踊躍而出中途頻  
有鬼神呵阻示以牒乃免益疾走登高山跌而寤未暇詣王氏  
既而復死明日王氏遣信來責曰昨夜夢監稅言問來事何不  
早告我自是三日始再蘇言某神遮留令作競渡戲視左臂所  
繫首掠猶存封識宛然徐後七年至秀州魏塘爲方氏傭耕又  
七年以負租穀不能償泛舟遁歸其鄉過太湖全家溺死

子弟  
景裴

說方氏  
婿也

范鍇華笑廡雜筆南潯鎮舊有狀元坊鎮志坊在鎮北爲宋紹  
熙甲寅覃恩狀元龍圖閣直學士張定建湖錄科目名表宋紹  
熙四年陳亮榜進士張定字雲峯烏程人龍圖閣直學士紹熙  
五年覃恩釋褐榜進士萬夢實歸安人沈柳橋云吳興備志選

舉紹熙四年陳亮榜進士為陳湘俞灝丁端祖劉泳之朱甲李岑陳至施一鳴陳璧九人並無張定攷趙翼陔餘叢攷云宋制

太學有積分之法分上舍中舍下舍當云內舍外舍以遞為升降亦多

至數千人按宋史選舉志三舍之法始于徽宗崇寧三年罷于宣和三年惟太學仍而不改而成均試

太學生并別有狀元之目癸辛雜誌解褐舍法下等上舍先免

解後免省待三年後到殿中等上舍徑到殿解謂鄉舉之試省謂禮部試殿謂廷

對或特旨徑行解褐此言中等之兩優也若上等上舍無有不徑行解褐不待特旨矣其釋褐

恩數優者謂之狀元謂恩例同進士第一擇日于崇化堂鳴鼓

集眾諸生兩廊序坐狀元襪襪立同舍班俟揖訖詣堂上香案

前望闕謝恩是也然則由鄉舉貢舉者曰進士出身由學校而

升上舍者曰上舍出身宋志各為科目宋史列傳凡由進士者

曰起家進士曰舉進士或曰中進士甲乙科其及第者則曰中

進士第曰進士及第曰第進士由上舍而仍就禮部試者則曰

以上舍中進士其免省試而徑廷對者此上舍自為廷試不與進士同試曰以

上舍中第其徑授官者曰以上舍釋褐或曰以上舍兩優釋褐

其他以諸科以祖蔭以父任最為明晰蓋宋制得人進士最盛

次則太學諸科皆不及也吾鎮之張定備志不載誠以由上舍

釋褐之恩數最優者耳郡邑志皆列于進士表咸謬即萬夢實

與張定同于紹熙五年由上舍釋褐宋世殿試未有不載帝紀

者紹熙五年無之芷畦先生湖錄似未達上舍釋褐恩優者亦

有狀元之目故疑為上年之榜又以萬夢實為進士均誤也吾

願後之修志者于進士後別立上舍一門或注明上舍釋褐于

某人之下

郭彖睽車志吳江檀邱村人陳布袋業匠氏其婦家在震澤涪  
 熙辛丑有故來謁其外姑將至路逢相識金大郎者相揖而過  
 陳先聞金死月餘矣私怪之欲至妻家謁其信否入拜其外姑  
 又拜其妻祖而伏不能起挾掖已不省人昇臥榻上手足拘攣  
 若被執縛狀閱兩時頃方醒始言路逢金事方拜欲起時金忽  
 自外出直控其頸卽覺昏憤若有人掉之東去海岸山巔執問  
 曾見金某日爲某事否對以與金初無干涉皆不知之旁有人  
 持文書展視云誤矣卽執陳投別一山上乃自尋路歸自臨安  
 由德清所過街衢人物不異常時至潯溪距震澤十八里見嶽  
 祠甚雄面正向北門外路平闊七八丈入者紛紛絕無出者凡

其所識近亡沒者往往見之潯溪素無嶽廟心獨怪之既入門  
 欄楯皆純鐵有人叱之出曰汝未當留卽由路東還過市橋後  
 遇金露首有人驅之甚速陳問何匆猝如此金且行且應曰被  
 急取案追攝對公事耳陳徐至家若過高阜甚峻有人自後推  
 撲遂醒

鈕琇臨野堂別集桃墩舊有宋大臣吳充墓充之後貧不自存  
 鬻其墓之土於里人顧姓者顧遣人平其封發石椁充赭袍碧  
 帶偉焉如生見風忽化兩夫人朱氏戴氏金釵及纏臂之屬光  
 燄猶新其墓誌則賈平章筆也按賈與吳不同時蓋吳之後人  
 乞賈爲銘耳桃墩亦吾邑地去吳興之南潯可四五里許汪志  
志並載陵墓今移入志餘又沈彤震澤縣志曰府志云順治十  
八年鄉人濬河得石碑一具墓誌石一座半已滅沒惟碑額題

南澤志 卷五十一 志餘一 北

吳樞密院使軀贖云名充吳江錢志因之今按宋史本傳充爲福建人元豐朝卒于京師又吳氏家譜充賜葬于河南開封府開封縣新里鄉大邊村神宗御題阡表在桃墩者乃充八世孫四川重慶府巴縣知縣端朝墓端朝次子逢龍誌其壙其墓碣大官磚刻康熙四年水患鄉人挑泥得之然則府志軀贖所云誤也

都穆寓意編吳江史文明古有薛尚功摹鐘鼎款識真跡二十卷後題云嘉熙三年冬十有一月望後十一日外孫朝請郎新知臨江軍事楊伯岳拜觀於廿四叔外翁書室後二十年弁陽周密得之外舅泳齋書房趙孟頫鑒定白野不華周伯琦題名張伯雨柯九思跋此帖舊爲吾鄉沈雄仲藏雄仲名洪元巨室號萬三之後善草隸書老而貧故史氏得之成化戊申予館授史氏九月其家火作書畫多付煨燼惟此帖及歐褚趙模書數卷獨存豈奇寶鬼神固衛之耶

孔行素信齋類藁宋末叛臣范殿帥文虎行兵擅殺不可言狀國初及宋末所得湖州南潯及慶元慈谿等處田土皆以豪勢奪之者至正壬辰紅巾寇犯杭城其孫范靜善爲錢唐縣尹者從逆劫官庫克復後伏誅田地房舍皆沒入官妻子以慶元裘日嚴所謀幸免其禍范之妻日嚴之異母姊也日嚴以同父之故痛其犯刑乃以重賂贖之其義亦可尚矣

宋濂跋德禪師船居詩後石船居詩十章唯庵禪師所賦蓋禪師嗣法千巖長公千巖則普應國師之弟子也普應證道之後因欲避世多好船中居至大己酉泊儀真辛亥泊吳江延祐丙辰泊南潯故詠船居者頗多而廣錄中所載者僅一二耳今唯庵亦有斯詠其殆有所本歟然船非水則不可行水非船則不

可居必二者相資而後可也無相居士則不謂然我非船何處不可行豈特水哉我非水何處不可居豈特船哉是將有不假跡而見不依形而存者矣唯庵以爲何如唯庵之詩托物爲喻無非發明宗門心要有益學者予故推其子孫相承之故喜而爲之書翰林學士金華宋濂題

錢泳履園叢話趙松雪嘗拜中峯和尚爲師畫一小像甚妙盤椅一張師橫臥其上朱履一雙脫在椅前此種畫法古所未見後有偈云身如天目山寂然不動尊慈雲灑法雨徧滿十方界化身千百億非幻亦非真覓贊不可得爲師作贊竟至大二年正月人日弟子吳興趙孟頫焚香謹贊此幅往在吳門陸白齋先生家見之曾倩南潯陸梅圃臨過一幅後爲友人攫去

又世所傳管仲姬墨竹最多而真者絕少憶於甲寅三月余在錢塘晤鮑萊飲先生於西湖寓中見一卷當是夫人生平傑作後有夫人之姪名道杲者嫁於姚居南潯一詩一跋寫作俱妙題云綠窗無長物樹蕙與滋蘭光風布淑氣揚揚畹畝閒窗外何所有修竹千萬竿密葉敷午陰勁節當歲寒方欣同臭味且以報平安吾妹忽來顧綠紗生薄寒幔結貽佩纒重重青琅玕寫真一揮灑翰墨猶未乾古意鎮長在高風渺難攀況有斐姬德懿名垂不刊後跋云至大二年四月二日吾妹魏國夫人仲姬見訪于南潯里第燕坐君子軒夫人笑曰君子名軒何以無竹爰使女奴磨墨寫此幅于軒中夫婦人之事箕帚中饋刺繡之外無餘事矣而吾妹則無所不能得非所謂女丈夫乎爲吾

子孫者可不寶諸侯他日妹丈松雪來看當又乞題詠也姚管道杲識

趙孟頫蘭亭十三跋蘭亭帖自定武石刻既亡在人間者有數有日滅無日增故博古之士以為至寶然極難辨又有未損五字者五字未損其本尤難得此蓋已損者獨孤長老送余北行攜以自隨至南潯北出以見示因從獨孤乞得攜入都他日來歸與獨孤結一重翰墨緣也至大三年九月五日孟頫跋于舟中獨孤名溟朋天台人

李日華六硯齋筆記嘉興天福寺僧慈力精華嚴教法其女兒陳自幼能書適南潯姚氏中年喪子女遂一意奉佛有手書觀世音普門品趙榮祿題其後今天福寺不知何在亦不見志乘獨賴魏公筆妙流傳耳誰謂翰墨非護法金湯耶

宋雷西吳里語吳興善畫者當以曹弗興為首稱趙孟頫亦入妙品其下則王蒙趙雍錢選唐棣張文樞胡欽亮徐士元孟玉澗莫廷錫諸人今鮮其倫矣

高□□吳興職官補遺引日損齋續稿從仕郎陳君常之晉陵人子二人長文昭次文杰今為從仕郎池州路東流縣尹女二人適鄭天錫鄒通德孫男二人在屋孫女一適湖州路南潯鎮巡檢夏某汪志按元代巡檢姓名無一可攷僅見於此然據明實地地理志及讀史方輿紀要後潘司巡檢移於南潯鎮巡檢豈元時已然歟

徐獻忠吳興掌故集王升字晉叔德清人其子名軫仕為崇信縣令升寄書云自舊年十一月初二日南潯別後至今年凡四

南潯志 卷五十一 志餘一

卅



南潯志 卷五十一  
得書本家德清之役已辦兩圖黃冊里長及歸安甲首皆不擾而辦里長不赴京倉此甚良法也正擬安靖幾時十二月間本縣又定新市弓兵分管十二都但辦什物勾捉軍人至今不得安息所費亦不少也凡事清心潔己以廉自守治民以仁慈爲心報國以忠勤爲本處已當以謙敬學業更須勉力熟讀新律自然守法不惑飲酒不可縱恣此後倘有的便可買附子一二枚川椒一二斤起稅而來餘物非所覲也此書寄與御史臺勾管于文桂被太祖皇帝搜出特詔獎賚之仍令有司除本戶雜役

又張羽字來儀潯陽人元季授安定書院山長因卜居吳興戴山東洪武初仕至太常寺丞兼直翰林院同掌文淵閣事卒葬九里岡郡志因其爲潯陽人遂訛以爲南潯土著甚謬

毛奇齡勝朝彤史拾遺記太祖孝慈高皇后馬氏吳興民沈秀貲富侔國曾爲上犒軍而築都城三之一上忌欲誅之后諫曰妾聞法也者所以誅不法也非所以誅不祥民富侔國民自不祥爾夫不祥之民天菑有之於國法何預焉乃釋秀戍雲南董斯張吳興備志留青日札云沈萬三秀名富字仲榮其弟萬四名貴字仲華本湖州南潯人父沈祐始徙蘇之長洲東蔡村貴之子漢傑又徙于化周莊今南京會同館乃其故宅初居東蔡村時人以汙萊之地歸之祐躬率子弟服勞糞治有方澹洩有法由是致富不貲後流雲南尋命選大戶家爲京官六曹得漢傑之子曰玠者擢員外郎受官辭祿上器重之至今傳二家

子孫在流所者尙富或云善點化術 劉三吾撰沈漢傑墓誌  
沈之先爲吳興人後徙長洲之東蔡村萬三諱富字仲榮與其  
弟萬四諱仲華率先兩浙輸其稅爲石者萬又嘗獻白金爲兩  
者千百以佐用度太祖卻之不得乃俾造廊房者六百五十披  
甲馬者千以萬四曾孫玠爲倉曹戶部員外郎玠之父曰漢傑  
卒葬南興隆蕩之北先外舅東樓公則云仲榮子茂旺國初獻  
白金千錠黃金百斤凡京城廳宇街道橋梁甲馬錢穀之類多  
取資於沈乃以茂爲廣積庫提舉姪孫爲戶部員外郎坐事當  
辟以營建工未就但黥其額後爲藍黨猶得乘馬出入工畢盡  
錄其家發遼陽戍籍其田數千頃每畝定賦九斗三升至今吳  
民糧額之重坐此近峯  
聞略

又農田餘話云古人無畫蒲萄者吳僧温日觀夜于月下視蒲  
萄影有悟出新意以飛白書體爲之酒酣興發以手潑墨然後  
揮筆迅于行草收拾散落頃刻而就如神甚奇特也既死其弟  
子沈仲華湖州人傳其法亦佳世多見之張按田子藝留青日  
札沈貴字仲華湖州南潯人豈卽其人耶

又元時富人陸道源貨甲吳下爲甫里書院山長一時名士咸  
與之遊處暮年對其治財者二人以貲曆付之曰吾產皆與汝  
惜爲汝禍耳道源遂爲黃冠師居陳湖之上開端雲觀居之改  
名宗靜又納貲爲道判時稱陸道判其故宅今爲竹堂寺所謂  
二人者其一卽沈萬三秀也其一姓葛亦富名不傳

黃暉蓬窗類記沈富字仲榮行三故吳人呼沈萬三秀元末江

南第一富家富卒二子茂旺我太祖定鼎金陵召廷見令其歲獻白金千錠黃金百觔甲馬錢穀多取資於茂茂為廣積庫提舉姪孫玠為戶部員外郎後茂罪當辟以有營建工緒未訖但黥額為藍黨猶得乘馬出入既而發遼陽從戎籍其田數千頃每畝定賦九斗三升吳下糧額之重坐此沈之從戎遼陽又穴地得金牛馬亦累千云

明太祖實錄洪武間南澤富民沈富璉市沈明前坵馮璋士林金鈿俱以富被籍湖州没官田最多孝陵雖有減租之詔七斗五升至四斗四升者不過減十之二民困未甦

陸采都公談纂沈萬三之富爐火所致其子既戍邊猶用以自給蓄牛馬千計無錫某御史嘗按遼陽友人知其事勸取其方御史至即坐沈以強盜繫之獄沈求免御史曰能予我丹方者貸爾罪沈謝言無方但先世所遺成藥耳因獻數合得免御史歸分友少許友亦致富

尖陽隨筆餘冬序錄載沈萬三妻麗娘死萬三作離思碑於墓上有云玉骨土融百形皆幻紅脂塵化萬態俱空云云則萬三亦復情種非蠢然一富民而已

明史王行傳富人沈萬三延行之家塾每文成酬白金鎰計行輒麾去曰使富而可守則然臍之慘不及矣

柳亭詩話金陵水西門有猪龍為患相傳明祖以沈仲榮聚寶盆鎮之乃止仲榮名富行三因呼為沈萬三張三丰授以爐火術其富敵國益即鼎器也

盛湖志明洪武初沈富於盛澤建南勝坊北勝坊以興市廛設

南書房北書房以處女閨又植紅梨萬樹於湖濱以點綴風景  
更築九孃樓以居其第九妾今其地猶名樓下而前窰下窰二  
村又其置盃窰處斜橋北塊更有洗盃池萬三井富豪遺蹟歷  
歷可數顧其以多財賈禍諸家所載言人人殊或云伏法或云  
遣戍疑莫能明及攷高士奇天祿識餘分註中載明洪武初每  
縣分人爲哥畸郎官秀五等督率運糧家給發戶由一紙哥最  
下秀最上等中又各有差鉅富者謂之萬戶三秀如沈萬三  
秀乃秀之三者按此則稱萬三秀者不止沈富一人其子若孫  
固亦沿是稱也諸家所載互相歧異或卽由此茲特彙而錄之  
參以臆見倘亦嗜古者所樂觀焉

吳江莫志沈萬三秀有宅在廿九都周莊富甲天下相傳由通  
番而得張士誠據吳時萬三已死二子茂旺密從海道運米至  
燕京洪武初以龍角來獻侑以白金二千錠黃金三百斤甲士  
十人甲馬十匹建南都廊房一千六百五十四楹酒樓四座築  
城甃階造鐵橋水關諸處費鉅萬萬計時方徵用人才茂爲廣  
積庫提舉旺之姪玠爲戶部員外郎

又洪武二十三年莫禮過訪之見其家屏去金銀器皿以刻絲  
竹鋪筵設紫定器十二卓每卓置羊脂玉二枚長尺餘闊寸許  
中有溝道所以置筯恐筯污刻絲也行酒用白瑪瑙盤盤有班  
紋乃紫葡萄一枝五猿采之謂之五猿爭果盞則赤瑪瑙有纏  
絲二物光彩爛然天然至寶明日其贅壻顧學文設宣和定器  
十二卓每湯一盃酒七行每行易一寶杯其後顧學文以姦淫

事坐黨禍連及萬三曾孫德全等六人及顧氏一門同日凌遲而禮亦連坐誅

王世貞國朝叢記大豪沈萬三伏法高皇帝籍沒其家所漏貲尙富其子文度爲人把持其短患之因蒲伏見紀綱白進黃金百兩白金千兩龍文被一牀龍角一株奇寶十具異繒綺四十疋願得從暫御列爲外府外廐歲致米六百石鈔二十萬貫醞百石布帛以時進食餌羞果以月進紀綱許之仍語文度吾後庭未充若爲我吳中徵好者不爲數文度因挾紀綱勢什五而分民間室無誰何者

吳江莫志分湖陸氏宅在廿九都元季富室也明初號采芝者悉以田產送沈萬三家財悉散之親族夫婦出家雲遊而去人皆笑之後沈受禍人始服其有見湧幢小品云賈人陸氏富甲江右萬三出其門甚見信用一旦歎曰老矣積而不散以釀禍也盡以與秀棄爲道士築室陳湖之上曰開雲觀以壽終

分湖小識近得沈富之孫沈伯熙墓誌銘乃南昌盧充穎所撰并書載伯熙諱莊字伯熙先世由南潯徙長洲大父富兄曰至洪武十九年春兄至以戶役故累緖赴秋官時伯熙亦獲戾京師與兄同繫獄旣而伯熙先出遂得疾卒於京嗚呼前明糧長之禍督運者至子孫而未已云云

蘇州府志同里陳某者洪武時爲序班一子駮甚妻梁氏有國色知書善吟詠周莊顧學文者沈萬三家贅壻也知而慕之因以稅長擘舟往來常泊其河下梁亦窺視焉顧學文乃賂惡少

年誘其夫飲博而使媼持異飾挑之遂成私約序班兄知之使童子竊其私書封寄序班序班思有以中之及藍玉事發序班從旁誣奏學文與藍通謀詔捕獲之詞連姻黨及其仇七十二家轉相援引并及處士張璠侍郎莫禮員外郎張瑾主事李鼎崔齡徐衍等不下千家黨禍大起五六年乃熄梁亦被其父逼令自縊死

夢蘭瑣筆我邑富士鎮有沈萬三之壻顧學文通某序班之妻此云序班妻與府志異序班之兄訐其為胡藍黨此亦與志異遂滅沈顧二族并盡洗富士之民而夷其室廬至成弘間遷居者日盛以富士之名賈禍也離合其文改為同里

談遷棗林雜俎南京都察院河南道署中牡丹單紅為國初沈

萬三物

紀氏族譜紀童官字彥恭號存石為紀氏三世祖有度量喜結納為鄉里所推重一日假寐夢至太湖之洞庭山值有扶乩者遂搖筆書云我是江南紀彥恭偶然飛夢洞庭東生平不負千金諾特與君家判吉凶隨其所叩一一應之及覺歷歷可記後其人來潯相訪曰公之精誠上躋仙儕矣又里人有之松江遭橫逆者被執詢知南潯人則曰識紀彥恭否眾詭曰識之遂釋一人歸曰若請彥恭至當盡釋之公為一往皆得歸

李樂見聞雜記吾鄉邇遠人家子孫貴顯其祖父未有不始於篤樸儉約者董潯陽先生之祖不識湖州府偶及見問這大牆門是何人家父封翰林編修字良儀平生款客未嘗設饅頭一

日施西亭憲副訪之亦止設捲蒸座客笑曰董良儀饅頭一生喫他不成矣蓋儉則殺生少用度節爲天道所默祐故子孫並發云

宋彝尊明詩綜趙金字淮獻布衣正德中詔徵不起居南潯著書闖闖間入其門者如深壑恆坐小艇出入五湖陶然自酌南坦箬溪二尚書結峴山會造廬請入社不應也年六十營繭室斂平生齒牙爪髮之已脫者洗滌而囊盛之以爲殉葬之具賦全歸詩三章又自爲生祭文輓詩自是不復出年八十九而卒其詩不蹈時習取境故超

胡承謀府志南潯一人偶遇江西林春元善相術相之曰公神色有變亟歸可得終于室其人歸與婦計曰我死無恨但一事未了里某富厚聘某人女我爲之媒今父死家凋落我死彼必賴婚矣遂以家積十金爲彼通財禮令畢姻事且告之故女父感悟擇日成之其夜如夢非夢見神告曰汝命已盡但有陰德上帝已增汝壽果年八十餘而終

董恂志稿余山人月山善記問嘗從所親詣郡吏乞部使者所下狀吏重有難色約以厚賂吏乃持牒手示之山人方一舉目因躡所親曰第出而覆其辭所親復以核吏不遺一字乃皆大驚人或口舉其歌詩至數十山人覆之不遺有難以多者至十數人皆舉數十山人益覆不遺當其舉時旁顧諧笑雜以酬答若不經意者人以是稱服見泌園集山人墓誌

紀氏族譜紀中字公權號西巖逸叟善詩文不樂仕進嘉靖十

四年卒葬箋字二圩法華庵之東李給諫見聞野史載公一生無疾暮年頸患痰疔七子孫請醫公曰吾自謂終身可辭藥餌今垂老不免耶俄夢人撲其頸七次覺而撫之則已瘥矣子廷鑾字鳴之號居易充府掾選遷省祭好讀書性剛直爲郡掾吏架閣庫火直指使者以事連府主親爲鞠訊強公任以脫卸之公忿然曰向者乾清宮災亦是紀某放火耶竟不能屈

朱國禎月溪公行實母氏吳石松先生甥女也石松宿儒甚奇公禮均諸子收塾中一年悉通大義董宗伯少二歲亦同學其父翠榆與民畏公善每曰吾兒儒若兒不儒骨似勝之宗伯雖貴盛不少誦宗伯亦終身兄事之誨家人曰此老嘗吹短笛崛強且有孫可善待蓋共學時塾師以短日二字令折七字公曰

短笛悠悠吹落日董赤喘徐之始曰短短書生勤白日至是尙心折云

范志引姑蘇志至正丙午大明兵至南潯王勝以城降蓋爲張士誠吏茲土者而逸其官階

南潯志卷五十終



歐陽修為文日遠亦能為之歐曰歐歐書也

心附注

歐志所載猶也至五兩平大開吳空南無王領口於海

士歸更茲土皆而以其百

